

詞

綜

冊五



詞綜卷二十五

宋詞五十首

盧氏一首

舒氏一首

魏夫人三首

延安夫人一首

李清照十一首

阮逸女一首

幼卿一首

吳淑姬二首

朱淑真五首

蔣興祖女一首

鄭意娘一首

慕容崱卿妻一首

孫道絢三首

鄭文妻二首

陸游妾一首

美奴二首

王清惠一首

徐君寶妻一首

金德淑一首

琴操一首

盼盼一首

聶勝瓊一首

蜀中妓一首

玉英一首

吳城小龍女一首

赤城韓夫人二首

衛芳華一首

紫姑一首

盧氏

天聖中氏父作縣令自漢州歸氏隨父行有

詞題泥溪驛壁

蝶戀花

蜀道青天烟霧翳帝里繁華迢遞何時至回望錦川

揮粉淚鳳釵斜鞦烏雲膩 綬帶雙垂金縷細玉珮  
珠璫露滴寒如水從此鸞妝添遠意畫眉學得遙山

翠

舒氏王齊叟彥齡之妻

點絳脣

獨自臨池悶來強把闌干凭舊愁新恨耗却年時興  
鷺散魚潛烟斂風初定波心靜照人如鏡少箇年  
時影按尺堅支志云彥齡元祐中樞密彥霖弟也善  
為詞曲妻舒亦工篇翰而婦翁本出武列彥齡頗失  
禮於翁翁怒邀其女歸竟至離絕女在父家偶獨行  
池上懷其夫乃作此詞

魏夫人丞相曾子宣之室

朱晦庵云本朝婦人能文者惟魏夫人及  
李易安二人而已

菩薩蠻

溪山掩映斜陽裏樓臺影動鴛鴦起隔岸兩三家出  
牆紅杏花 綠楊堤下路早晚溪邊去二見柳綿飛  
離人猶未歸

好事近

雨後曉寒輕花外曉鶯啼歇愁聽隔溪殘漏正一聲

淒咽 不堪西望去程賒離腸萬回結不似海棠花  
下按涼州時節

點絳脣

波上清風畫船明月人歸後漸消殘酒獨自凭欄久  
聚散匆匆此恨年年有重回首淡烟疎柳隱隱蕪  
城漏

延安夫人侯鯖錄云是蘇丞相子容之妹

更漏子 寄季玉妹

小闌干深院宇依舊當時別處朱戶鎖玉樓空一簾  
霜日紅 弄珠江何處是望斷碧雲無際凝淚眼出  
重城隔溪羌笛聲

李清照字易安格非之女嫁趙明誠有漱玉集一

卷

張正夫云易安元宵永遇樂詞云落日鎔  
金暮雲合璧已自工緻至于染柳烟輕吹  
梅笛怨春意知幾許氣象更好後疊云于  
今憔悴風鬢霜鬢怕向花間重去皆以尋  
常語度入音律鍊句精巧則易平淡入調  
者難且秋詞聲聲慢此乃公孫大娘舞劍  
手本朝非無能詞之士未會有一下十四

疊字者後疊又云到黃昏點點滴滴又使疊字俱無斧鑿痕怎生得黑黑字不許第  
二人押婦人有此奇筆殆間氣也

鳳凰臺上憶吹簫

香冷金猊被翻紅浪起來慵自梳頭任寶奩塵滿日  
上簾鉤生怕離懷別苦多少事欲說還休新來瘦非  
干病酒不是悲秋 休休這回去也千萬遍陽關也  
則難留念武陵人遠烟鎖秦樓惟有樓前流水應念  
我終日凝眸凝眸處從今又添一段新愁

壺中天慢

蕭條庭院又斜風細雨重門須閉寵柳嬌花寒食近  
種種惱入天氣險韻詩成扶頭酒醒別是閑滋味征  
鴻過盡萬千心事難寄 樓上幾日春寒簾垂四面  
玉闌干慵倚被冷香消新夢覺不許愁人不起清露  
晨流新桐初引多少遊春意日高烟斂更看今日晴  
未黃叔暘云前輩稱易安綠肥紅瘦為佳句予謂寵  
柳嬌花語亦甚奇俊前此未有能道之者

一剪梅

紅藕香殘玉簟秋輕解羅裳獨上蘭舟雲中誰寄錦  
書來鴈字回時月滿西樓 花自飄零水自流一種

相思兩處閑愁此情無計可消除纔下眉頭却上心頭

醉花陰九日

薄霧濃雲愁永晝瑞腦銷金獸佳節又重陽玉枕紗廚半夜涼初透東籬把酒黃昏後有暗香盈袖莫道不銷魂簾卷西風人似黃花瘦

怨王孫春暮

帝里春晚重門深院草綠階前暮天鴈斷樓上遠信誰傳恨綿綿多情自是多沾惹難擯舍又是寒食也秋千巷陌人靜皎月初斜浸梨花

浣溪沙

樓上晴天碧四垂樓前芳草接天涯勸君莫上最高梯新筍已成堂下竹落花都入燕巢泥忍聽林表杜鵑啼

又

髻子傷春懶更梳晚風庭院落梅初淡雲來往月疎疎玉鴨薰爐閑瑞腦朱櫻斗帳掩流蘇通犀還解辟寒無

武陵春

風住塵香花已盡日晚倦梳頭物是人非事事休欲

語淚先流 聞說雙溪春尚好也擬汎輕舟只恐雙  
溪舴艋舟載不動許多愁

點絳脣

寂寞深閨柔腸一寸愁千縷惜春春去幾點催花雨  
倚遍闌干祇是無情緒人何處連天芳樹望斷歸  
來路

賣花聲

簾外五更風吹夢無踪畫樓重上與誰同記得玉釵  
斜撥火寶篆成空 回首紫金峯雨潤烟濃一江春  
浪醉醒中留得羅襟前日淚彈與征鴻

聲聲慢

尋尋覓覓冷冷清清悽悽慘慘戚戚乍暖還寒時候  
最難將息三杯兩盞淡酒怎敵他曉來風急鴈過也  
正傷心却是舊時相識 滿地黃花堆積憔悴損如  
今有誰堪摘守著窗兒獨自怎生得黑梧桐更兼細  
雨到黃昏點點滴滴這次第怎一箇愁字了得

阮逸女

花心動

仙苑春濃小桃開枝枝已堪攀折乍雨乍晴輕暖輕  
寒漸近賞花時節柳搖臺榭東風軟簾櫳靜幽禽調



舌斷魂遠閑尋翠徑頓成愁結 此恨無人共說還  
立盡黃昏寸心空切強整繡衾獨掩朱扉簟枕爲誰  
鋪設夜長更漏傳聲遠紗窗映銀缸明滅夢回處梅  
梢半籠淡月

幼卿能改齋漫錄云宣和間有女子幼卿題詞陝

府驛壁

### 賣花聲

極目楚天空雲雨無蹤謾留遺恨鎖眉峯自是荷花  
開較晚孤負東風 客館歎飄蓬聚散匆匆揚鞭那  
忍驟花驄望斷斜陽人不見滿袖啼紅

吳淑姬 嫁士人楊子治有陽春白雪詞五卷

黃叔暘云淑姬詞佳處不減李易安

### 惜分飛 送別

岸柳依依拖金縷是我朝來別處惟有多情絮故來  
衣上留人住 兩眼啼紅空彈與未見桃花又去一  
片征帆舉斷腸遙指苕溪路

### 祝英臺近

粉痕消芳信斷好夢總無據病酒無聊欹枕聽殘雨  
斷腸曲曲屏山溫溫沉水都是舊看承人處 久離  
阻應念一點芳心閑愁知幾許偷照菱花清瘦自羞

觀可堪梅子酸時楊花飛絮亂鶯又催將春去

朱淑真錢塘人有斷腸集詞一卷

蝶戀花 送春

樓外垂楊千萬縷欲繫青春少住春還去猶自風前  
飄柳絮隨春且看歸何處 滿目山川聞杜宇便做  
無情莫也愁人意把酒送春春不語黃昏却下瀟瀟  
雨

眼兒媚

風日遲遲弄輕柔花徑暗香流清明過了不堪回首  
雲鎖朱樓 午窗睡起鶯聲巧何處喚春愁綠楊影  
裏海棠枝畔紅杏梢頭

謁金門

春已半觸目此情無限十二闌干閑倚遍愁來天不  
管 好是風和日暖輸與鶯鶯燕燕滿院落花簾不  
卷斷腸芳草遠

生查子 元夕

去年元夜時花市燈如晝月上柳梢頭人約黃昏後  
今年元夜時月與燈依舊不見去年人淚濕春衫  
袖

又

年年玉鏡臺梅蕊宮妝困今歲未還家怕見江南信  
酒從別後疎淚向愁中盡遙想楚雲深人遠天涯  
近

蔣興祖女靖康間金人犯闕陽武蔣令興祖死之

其女爲賊鹵去題詞雄州驛中蔣令浙  
西人

減字木蘭花題雄州驛

朝雲橫度輓輓車聲如水去白草黃沙月照孤村三  
兩家飛鴻過也百結愁腸無晝夜漸近燕山回首  
鄉關歸路難

鄭意娘楊思厚之妻撒入太尉自盱眙掠得之不  
辱而死

好事近

往事與誰論無語暗彈清血何處最堪腸斷是黃昏  
時節倚樓凝望又徘徊誰解此情切何計可同歸  
鴈趁江南春色

慕容崑卿妻

浣溪沙

滿目江山憶舊游汀花汀草弄春柔長亭纔住木蘭  
舟好夢易隨流水去芳心猶逐曉雲愁行人莫上

詞

綜卷二十五

五中華書局聚

望京樓平江雍熙寺月夜有客聞婦入歌此詞傳之  
姑蘇崑嶽獅驚曰此余亡妻平生作也詢所由來正其  
妻殯處

孫道絢號冲虛居士黃銖母

如夢令 宮詞

翠擘紅蕉影亂月上朱欄一半風自碧空來吹落歌  
珠一串不見不見人被繡簾遮斷

憶少年 葛氏姪女告歸送之

雨晴雲斂烟花淡蕩遙山凝碧驅車間征路賞春風  
南陌 正雨後梨花幽艷白悔匆匆過了寒食歸家  
漸春暮探酴醾消息

秦樓月 季温歸樵陽書寄

秋寂寞秋風夜雨傷離索傷離索老懷無奈淚珠零  
落 故人一去無期約尺書忽寄西飛鶴西飛鶴故  
人何在水村山郭

鄭文妻孫氏

憶秦娥 絕妙作李嬰

花深深一鈎羅幃行花陰行花陰閑將柳帶試結同  
心 日邊消息空沈沈畫眉樓上愁登臨愁登臨海  
棠開後望到如今古杭雜記云文秀州入太學服膺

齋上舍孫氏寄以詞一時傳播酒樓伎館皆歌之

燭影搖紅

乳燕穿簾亂鶯啼樹清明近隔簾時度柳花飛猶覺  
寒成陣長記眉峯偷隱臉桃紅猶藏酒暈背人微笑  
半鞦韆珠翠逞春嬌沒個他風韻若見賓鴻試問待相  
將綵箋寄恨幾時得見鬪草歸來雙鴛鴦微潤

陸游妾陸游之蜀宿一驛中見題壁詩詢之則驛  
中女也遂納爲妾半載夫人逐之妾賦詞  
而別

生查子

只知眉上愁不識愁來路窗外有芭蕉陣陣黃昏雨  
曉起理殘妝整頓教愁去不合畫春山依舊留愁  
住

美奴陸藻敦禮侍兒

如夢令 送別

日暮馬嘶人去船逐清波東注後夜最高樓還肯思  
量人否無緒無緒生怕黃昏疎雨

卜算子

送我出東門乍別長安道兩岸垂楊鎖暮烟正是秋

光老 一曲古陽關莫惜金尊倒君向瀟湘我向秦  
魚鴈何時到

王清惠宋昭儀入元為女道士號冲華

滿江紅題驛壁

太液芙蓉渾不是舊時顏色曾記得承恩雨露玉樓  
金闕名播蘭簪妃后裏暈潮蓮臉君王側忽一朝  
鼙鼓揭天來繁華歇 龍虎散風雲滅千古恨憑誰說  
對山河百二淚沾襟血驛館夜驚塵土夢宮車曉碾  
關山月願娉娥相顧肯從容隨圓缺東園友聞云此  
詞或傳昭儀下張璠英所賦

徐君寶妻岳州人被掠至杭其主者數欲犯之輒

以計脫主者強焉告曰俟祭先夫然後為

君婦主者許諾乃焚香再拜題詞壁上投

池中死

滿庭芳題壁

漢上繁華江南人物尚遺宣政風流綠窗朱戶十里  
爛銀鈎一日刀兵齊舉旌旗擁百萬貔貅長驅入歌  
樓舞榭風捲落花愁 清平三百載典章人物掃地  
都休幸此身未北猶客南州破鑑徐郎何在空惆悵  
相見無由從此身未北猶客南州破鑑徐郎何在空惆悵

金德淑宋宮人入元歸章丘李生

望江南贈汪水雲

春睡起積雪滿燕山萬里長城橫縞帶六街燈火已闌珊人在玉樓間

琴操杭州伎後削髮為尼

滿庭芳改少游詞

山抹微雲天連衰草畫角聲斷斜陽暫停征轡聊共  
飲離觴多少蓬萊舊侶頻回首烟靄茫茫孤村裏寒  
鴉萬點流水遶紅牆 魂傷當此際輕分羅帶暗解  
香囊謾贏得秦樓薄倖名狂此去何時見也襟袖上  
空有餘香傷心處長城望斷燈火已昏黃能改齋漫  
錄云西湖有一侔閑唱少游滿庭芳誤舉畫角聲斷  
斜陽琴操在側云譙門非斜陽也侔因戲曰爾可改  
韻否琴操即改作陽字韻東坡聞而賞之

盼盼瀟南官妓

惜春容侑涪翁

少年看花雙鬢綠走馬章臺絃管逐而今老更惜花  
深終日看花看不足 坐中美女顏如玉為我同歌  
金縷曲歸時壓得帽簷欹頭上春風紅簌簌

聶勝瓊長安妓歸李之問

鷓鴣天寄別李生

珍做宋版印

玉慘花愁出鳳城蓮花樓下柳青青尊前一唱陽關  
曲別箇人人第五程尋好夢夢難成有誰知我此  
時情枕前淚共階前雨隔箇窗兒滴到明

蜀中妓

市橋柳送行

欲寄意渾無所有折盡市橋官柳看君著上春衫又  
相將放船楚江口後會不知何日又是男兒休要  
鎮長相守苟富貴無相忘若相忘有如此酒周公謹  
云詞亦可喜

玉英蓬萊仙人見尸堅志

浪淘沙

塞上早春時煖律猶微柳舒金綫水回隄料得江鄉  
應更好開盡梅蹊書漏漸遲遲愁損香肌幾回無  
語斂雙眉凭遍闌干十二曲日下樓西

吳城小龍女

江亭怨

簾卷曲欄獨倚山展暮天無際淚眼不曾晴家在吳  
頭楚尾數點雪花亂委撲漉沙鷗驚起詩句欲成  
時沒入蒼烟叢裏冷齋夜話云黃魯直登荊州亭柱



間有此詞夜夢一女子云有感而作魯直驚悟曰此必吳城小龍女也

### 赤城韓夫人

#### 法駕導引

東風起東風起海上百花搖十八風鬟雲半動飛花和雨著輕綃歸路碧迢迢

又

烟漠漠烟漠漠天淡一簾秋自洗玉舟斟日醴月華微映是空舟歌罷海西流紹興間都下有烏衣椎髻女子歌此詞凡九闕皆非人世語或記之以問一道士道士驚曰此赤城韓夫人所製水府蔡真君法駕導引也烏衣女子疑龍云

衛芳華永嘉滕穆僑居臨安月夜游聚景園遇一

女鬼自言是衛芳華故宋理宗朝宮人

### 木蘭花慢

記前朝舊事曾此地會神仙向月地雲階重攜翠袖來拾花鈿繁華總隨流水歎一場春夢杳難圓廢港芙蓉滴露斷堤楊柳垂烟兩峯南北只依然輦路草芊芊恨別館離宮烟銷鳳蓋波沒龍船平生玉屏金屋對漆燈無焰夜如年落日牛羊壠上西風燕雀

詞

綜卷一十五

八中華書局聚

林邊

紫姑

吳興周權巽伯乾道五年知衢州西安縣招  
郡士沈延年邀致紫姑神賦牡丹詞

瑞鶴仙賦一捻紅牡丹

靚嬌紅細捻是西子當日留心千葉西都競裁接好  
園林臺榭何妨日涉輕羅慢褶費多少陽和調燮向  
曉來露浥芳苞一點醉紅潮頰 雙鬢姚黃國艷魏  
紫大香倚風羞怯雲鬢試插引動狂蜂蝶况東君開  
宴賞心樂事莫惜獻酬頻叠看相將紅藥翻堦尚餘  
媵妾

詞綜卷二十五

詞綜卷二十六

金詞六十二首

完顏璫一首

蔡松年一首

吳激三首

劉仲尹二首

高士談一首

王庭筠三首

趙可一首

劉迎二首

王特起四首

韓玉三首

趙秉文一首

高憲一首

党懷英二首

王渥一首

景覃三首

王礪一首

趙攄一首

折元禮一首

劉著一首

李獻能一首

李晏一首

高永一首

段克己二首

段成己一首

元好問二十一首

王予可一首

鄧千江一首

完顏璫

字仲寶一字子瑜世宗之孫越王永功子

自號樗軒居士封密國公宣宗南渡以開

府儀同三司奉朝請所著有如庵小藁

青玉案

凍雲封却駢岡路有誰訪溪梅去夢裏疎香風暗度  
覺來惟見一窗涼月瘦影無尋處 明朝畫筆江天  
暮定向漁簑得奇句試問簾前深幾許兒童笑道黃  
昏時候猶是廉纖雨

蔡松年

字伯堅從父靖除真定府判官遂為真定

人累官吏部尚書參知政事遷尚書左丞

封鄆國公進拜右丞相加儀同三司後又

封衛國公卒加封吳國公謚文簡有蕭閑

公集六卷

尉遲杯

紫雲暖恨翠雛珠樹雙栖晚小花靜院相逢的的風  
流心眼紅潮照玉盃午香重草綠宮羅淡喜銀屏小  
語私分麝月春心一點 華年共有好願何時定妝  
鬟暮雨零亂夢似花飛人歸月冷一夜小山新怨劉  
郎興尋常不淺况不似桃花春溪遠覺情隨曉馬東  
風病酒餘香相半

吳

激

字彥高建州人宋宰相拭之子米芾之婿

使金留不遣官翰林待制皇統初出知深

州卒有東山集詞一卷時彥高與伯堅才

譽並推號吳蔡體

黃叔暘云彥高詞精妙悽惋

風流子感舊

書劍憶遊梁當時事底處不堪傷望蘭楫嫩漪向吳南浦杏花微雨窺宋東牆鳳城外燕隨青步障絲惹紫游韁曲水古今禁烟前後暮雲樓閣芳草池塘回首斷人腸流年去如電雙鬢如霜欲遣從來遺恨頻近清觴聽出塞琵琶風沙浙瀝寄書鴻鴈烟月微茫不似海門潮信猶到潯陽

春從天上來感舊

海角飄零歎漢苑秦宮墜露飛螢夢回天上金屋銀屏歌吹競舉青冥問當時遺譜有絕藝鼓瑟湘靈促哀彈似林鶯啞啞山溜泠泠梨園太平樂府醉幾度春風鬢髮星星舞徹中原塵飛滄海風雪萬里龍庭寫<sup>口</sup>笳幽怨人憔悴不似丹青酒微醒對一軒涼月燈火青熒黃叔暘云三山鄭中卿從張貴謨北使時聞彼中有歌此調者元遺山云曾見王防禦公玉說此詞皆用琵琶故實引據甚明惜不能記憶

人月圓宴張侍御家有感

南朝千古傷心地還唱後庭花舊時王謝堂前燕子飛入人家恍然在遇天姿勝雪宮鬢堆鴉江州司

馬青衫淚濕同是天涯洪景盧云先公在燕山赴北  
人張總侍御家集出侍兒佐酒中有一人意狀摧抑  
可憐叩其故乃宣和殿小宮姬也坐客翰林直學士  
吳激作詞紀之聞者揮涕 中州樂府云彦高賦此  
時字文叔通亦賦念奴嬌先成而頗近鄙俚及見彦  
高作茫然自失是後人有求作樂府者叔通即批云  
吳郎近以樂府名天下可往求之

劉仲尹

字致君蓋州人正隆中進士以潞州節度  
副使召為都水監丞有龍山集

浣溪沙

春情

繡館人人倦踏青粉垣深處簾錢聲賣花門外綠陰  
清 簾幕風柔飛燕燕池塘花暖語鶯鶯有誰知道  
一春情

琴調相思引

蠶欲眠時日已曛桑柔葉大綠團雲羅敷猶小陌上  
看行人 翠實低條梅弄色輕花吹攏麥初勻鳴鳩  
聲裏過盡太平村

高士談

字子文一字季默宣和末任忻州戶曹任  
金為翰林直學士有

減字木蘭花

西湖睡起飛絮游絲春老矣漲綠涵空十頃玻璃四面風平時事少天與湖山供坐嘯他日西州却怕羊曇感舊遊

王庭筠

字子端蓋州熊岳人大定中登第官至翰林修撰晚年卜居黃華山自號黃華老人

訴衷情

夜涼清露滴梧桐庭樹又西風薰籠舊香猶在曉帳暖芙蓉雲淡薄月朦朧小簾櫳江湖殘夢半在南樓畫角聲中

蝶戀花

衰柳疎疎苔滿地十二闌干故國三千里南去北來人老矣短亭依舊殘陽裏紫蟹黃柑真解事似倩西風勸我歸歟未王粲登臨寥落際鴈飛不斷天連水

百字令小雪家集作

山堂晚色滿疎籬寒雀烟橫高樹小雪輕盈如解舞故故穿簾入戶掃地燒香團圓一笑不道因風絮冰澌生硯問誰先得佳句有夢不到長安此心安穩只有歸耕去試問雪溪無恙否十里淇園佳處修竹林邊寒梅樹底准擬全家住柴門新月小橋誰掃歸

詞

綜卷二十六

三中華書局聚

路

趙 可字獻之高平人貞元二年進士仕至翰林

直學士有玉峯散人集

望海潮 贈妓

雲垂餘髮霞拖廣袂人間自有飛瓊三館俊遊百街  
高選翩翩老阮才名銀漢會雙星尚相看脈脈似隔  
盈盈醉玉添春夢雲同夜惜卿卿 離觴草草同傾  
記靈犀舊曲曉枕餘醒海外九州郵事一別此生未  
卜他生江上數峯青悵斷雲殘雨不見高城二月遼  
陽芳草千里路傍情

劉

迎字無黨東萊人大定中進士除幽王府記  
室改太子司經有詩文樂府號山林長語

烏夜啼

離恨遠縈楊柳夢魂長遶梨花青衫記得章臺月歸  
路玉鞭斜 翠鏡啼痕印袖紅牆醉墨籠紗相逢不  
盡平生事春思入琵琶

又

菱鑑玉篔秋月蕙爐銀葉朝雲宿醒人困屏山夢烟  
樹小江村 翠甲未消蘭恨粉香不斷梅魂離愁分  
付殘春雨花外泣黃昏



王特起字正之寧縣人擢第爲沁源令後爲司監  
喜遷鶯別內

東樓歡宴記遺簪綺席題詩紈扇月枕雙歌雲窗同  
夢相伴小花深院舊歡頓成陳跡翻作一番新怨素  
秋晚聽陽關三疊一尊相餞留戀情繾綣紅淚洗  
妝雨濕梨花面鴈底關河馬頭星月西去一程程遠  
但願此心如舊天也不違人願再相見把生涯分付  
藥爐經卷

又

登山臨水正桂嶺瘴開蘋洲風起玄鶴高翔蒼鷹遠  
擊白鷺欲飛還止江上層波似練沙際行人如蟻目  
斷處見遙峯簇翠殘霞浮綺千里關塞遠鴈陣不  
來猶把闌干倚數疊悲笳一行征旆城郭幾番成毀  
白塔前朝陵寢青嶂故都營壘念往事但寒烟滿目  
愁蟬盈耳

又題郝仙女廟壁

汀洲蘋滿記翠籠采采相將鄰媛蒼渚烟生金支光  
爛人在霧綃鮫館小鬟頓成雲散羅襪凌波不見翠  
鸞遠但清溪如鏡野花留鬢情睠驚變現身後神  
功絲滿吳蠶繭漢女菱歌相如瑤瑟香動倚雲層殿

詞

綜卷一十六

四一中華書局聚

形車載花一色醉盡碧桃清  
燕故山晚歎流年一笑  
人間飛電

梅花引

山之麓河之曲一灣秀色盤虛谷  
水溶溶雨濛濛有人行李蕭蕭  
落葉中人家籬落炊烟濕天外  
雲峯迷淡碧野雲昏失前村  
溪橋路滑平沙沒舊痕

韓

玉

字溫甫北平人擢第入翰林為應奉文字

後為鳳翔府判官有東浦詞一卷

感皇恩 廣東與康伯可  
遠柳綠含烟土膏才透雲海微茫露晴岫故鄉何在  
夢寐草堂溪友舊時遊賞處誰攜手塵世利名於  
身何有老去生涯殢樽酒小橋流水一樹雪香寒瘦  
故人今夜月相思否

減字木蘭花 贈歌者

香檀素手緩理新詞來伴酒音調淒涼便是無情也  
斷腸莫歌楊柳記得渭城朝雨後客路茫茫幾度  
東風蕙草長

賀新郎

柳外鶯聲碎晚晴天東風力軟嫩寒初退花底覓春  
春已去時見亂紅飛墜又閑傍闌干十二欄外青山

烟縹緲遠連空愁與眉峯對凝望處兩疊翠  
鴛鴦結帶靈犀佩綺屏深香羅帳小寶檠燈背誰謂彩雲  
和夢斷青翼阻尋後會待都把相思情綴便做錦書  
難寫恨奈菱花都見人憔悴那更有枕函淚

趙秉文字周臣磁州人擢第入翰林因言事外補

後再入館爲修撰待制轉禮部郎中出典  
肯嵐平定甯邊三郡南渡爲直學士遷侍  
讀拜禮部尚書再改翰林學士自號閑閑  
居士所著有溢水集

### 青杏兒

風雨替花愁風雨罷花也應休勸君莫惜花前醉今  
年花謝明年花謝白了人頭 乘興兩三甌揀溪山  
好處追遊但教有酒身無事有花也好無花也好選  
甚春秋

高憲字仲常遼東人王庭筠之甥泰和三年登

第仕博州防禦判官

### 貧也樂

城下路淒風露今人犁田昔人墓岸頭沙帶蒹葭漫  
漫昔時流水今人家 黃埃赤日長安道倦客無漿  
馬無草開函關閉函關千古如何不見一人閑

党懷英字世傑其先馮翊人後居泰安宋太尉進

十一代孫舉進士官翰林學士承旨卒謚

文獻有竹谿集

感皇恩

一葉下梧桐新涼風露喜鵲橋成渺雲步舊家機杼  
巧織紫綃如霧新愁還織就無重數天上何年人  
間朝暮回首星津又空渡盈盈別淚散作半空疎雨  
離魂都付與秋將去

月上海棠

傲霜枝裊團珠蕾冷香霏烟雨晚秋意蕭散繞東籬  
尚彷彿見山清氣西風外夢到斜川栗里斷霞魚  
尾明秋水帶三兩飛鴻點烟際疎林颯秋聲似知人  
倦游無味家何處落日西山紫翠

王

渥字仲澤太原人擢第令甯陵召為省掾使  
宋回為太學助教充樞密院經歷官遷右  
司都事天興中出援武仙戰歿

水龍吟從商帥國器獵同裕之賦

短衣匹馬清秋慣曾射虎南山下西風白水石鯨鱗  
甲山川圖畫千古神州一時勝事賓僚儒雅快長堤  
萬弩平岡千騎波濤卷魚龍夜落日孤城鼓角笑

珍做宋版印

歸來長圍初罷風雲慘澹貌貅得意旌旗閑暇萬里  
天河更須一洗中原兵馬看鞬橐嗚咽咸陽道左拜  
西還駕

景

覃字伯仁華陽人自號涓濱野叟

天香

市遠人稀林深犬吠山連水村幽寂田里安閑東鄰  
西舍淮擬醉時歡適社祈雨禱有簫鼓喧天吹擊宿  
雨新晴壠頭閑看露桑風麥無端短亭暮驛恨連  
年此時行役何似臨流蕭散緩衣輕幘炊黍烹雞自  
勞有脆綠甘紅薦芳液夢裏春泉糟牀夜滴

又

百歲中分流年過半塵勞繫人無盡桑柘週圍菅茅  
低架且喜水親山近倦飛高鳥算也有閑枝栖穩紙  
帳練衾日高睡起懶梳蓬鬢閑堵土花碧潤緩芒  
屨恐傷蝸蚓側掩衡門空解草玄誰信俗駕輕雲易  
散賴獨有蓮峯破孤悶世事悠悠從教莫問

鳳栖梧

倦客情悰紛似縷小院無人臥聽秋蟲語歸意已攙  
新鴈去晚涼更作蕭蕭雨架上秋衣蠅點素冷菊  
殘妝尚被春花妬別有溪山容杖屨等閑不許知人

處

王

礪

字逸賓汴梁人以丞相馬吉甫舉德行才能授鹿邑主簿就乞致仕

浣溪沙

夢中作

林樾人家急暮砧夕陽人影入江深倚欄疎快北風襟  
雨自北山明處黑雲從白鳥去邊陰幾多秋思

亂鄉心

趙

據

字子充宛平人官內翰自號醉全道人

南歌子

澗草萋萋綠林鶯恰恰啼汀沙過雨便無泥換得芒  
屨隨意到前溪浦漱渾堪畫雲烟總是題江湖老  
伴一簑衣真箇斜風細雨不須歸

折元禮

官治中

望海潮從軍舟中作

地雄河岳疆分韓晉潼關高壓秦頭山倚斷霞江吞  
絕壁野烟縈帶滄洲虎旆擁貔貅看陣雲截岸霜氣  
橫秋千雉巖城五更殘角月如鉤西風曉入貂裘  
恨儒冠誤我却羨兜牟六郡少年三關老將賀蘭烽  
火新收天外嶽蓮樓想斷雲橫曉誰識歸舟剩著黃  
金換酒羯鼓醉涼州

劉

著字鵬南皖城人宣政未登進士第仕金官

翰林脩撰出守武遂終忻州刺史

鷓鴣天

雪照山城玉指寒一聲羌管怨樓間江南幾度梅花  
發人在天涯鬢已斑星點點月團團倒流河漢入  
杯盤翰林風月三千首寄與吳姬忍淚看

李獻能

字欽叔河中人擢第入翰林為應奉出為

鄜州觀察判官再入遷修撰正大末授河  
中帥府經歷官

春草碧

紫簫吹破黃昏月簌簌小梅花飄香雪寂寞花底風  
鬟顏色如花命如葉千里宛凝塵凌波襪心事鑑  
影鸞孤箏絃絕鴈絕舊時雪堂人今華髮腸斷金縷新  
聲杯深不覺琉璃滑醉夢遶南雲花上蝶

李

晏字致美高平人皇統中進士官至禮部尚

書翰林學士承旨卒謚文簡

虞美人

佳人酒暈潮生頰艷艷霞千疊雨餘紅淚濕黃昏誤  
認當年人面倚朱門飄零又送青春暮悵望劉郎  
去教人不恨五更風只恨馬蹄無處避殘紅

詞

綜卷二十六

七中華書局聚

高

永字信卿初名夔字舜卿又名揆漁陽人累舉不第正大末上書不報自號應菴

大江西上曲滕王閣

閑登高閣數興亡滿目風烟塵土畫棟珠簾當日事  
不見朝雲暮雨秋水長天落霞孤鶩千載名如故長  
空澹澹去鴻嘹唳誰數 遙憶才子當年如椽健筆  
坐上題佳句物換星移知幾度遺恨西山南浦往事  
無憑昔人安在漫向尋歌舞長江東注爲誰流盡今  
古

段克己字復之河東人進士入元不仕有遊齋樂

府一卷

漁家傲

龍尾溝邊飛柳絮虎頭山下花無數花底醉眠留村  
屨花上露隨風散漫飄香霧 老去逢春能幾度不  
妨且作風流主明日不知風共雨回首處夕陽又下  
西山去

又

詩句一春渾漫賦 一作與紛紛紅紫俱塵土樓外垂  
楊千萬縷風落絮闌干倚遍空無語 畢竟春歸何  
處所樹頭樹底無尋處惟有閑愁將不去依舊住伴



人直到黃昏雨

役成己字誠之克己弟進士主宜陽簿入元不仕

有菊軒樂府一卷

大江東去送楊國瑞南歸

西風溢浦鴈初飛秋水渺茫無際有底忙時來復去  
汎若虛舟不繫籬菊將開村醪初熟且住為佳耳笑  
言相答個中吏隱無愧歲月不貸閑人君顏非少  
我髮白如此好把金杯休去手萬事惟消沉醉日轉  
山腰馬嘶柳外歌闋行人起憑高西望相思目斷烟  
水

元好問字裕之秀容人興定五年進士歷官左司

都事轉行尚書省左司員外郎金亡不仕

有遺山集

張叔夏云遺山詞深于用事精于鍊句風

流蘊藉處不減周秦

水調歌頭賦德新王丈玉溪溪在嵩前費莊兩

山絕勝處也

空濛玉華曉瀟灑石淙秋嵩高大有佳處元在玉溪  
頭翠壁丹崖千丈古木寒藤兩岸村落帶林丘今日  
好風色可以放吾舟百年來算惟有此翁游山川

邂逅佳客猿鳥亦相留父老雞豚鄉社兒女籃輿竹  
几來往亦風流萬事已華髮吾道付滄洲

木蘭花慢遊三臺

渺漲江東下流不盡古今情記海上三山雲中雙闕  
當日南城黃鶴幾年飛去淡春陰平野草青青冰井  
猶殘石罨露盤已失金莖風流千古短歌行慷慨  
缺壺聲想醺酒臨江賦詩鞍馬詞氣縱橫飄零舊家  
王粲似南飛烏鵲月三更笑殺西園賦客壯懷無復  
平生

最高樓商於魯縣北山

商於路山遠客來稀雞犬靜柴扉東家勸飲薑芽脆  
西家留宿芋魁肥覺重來猿與鶴總忘機問華屋  
高資誰不戀問美食大官誰不羨風浪裏竟安歸雲  
山既不求吾是林泉又不責吾非任年年藜藿飯芟  
荷衣

玉漏遲有懷浙江別業

浙江歸路杳西南却羨投林高鳥升斗微官世累苦  
相縈繞不如麒麟畫裏又不與巢由同調時自笑虛  
名負我半生吟嘯擾擾馬足車塵被歲月無情暗  
消年少鍾鼎山林一事幾時曾了四壁秋蟲夜雨更

一點殘燈斜照清鏡曉白髮又添多少

### 滿江紅

一枕餘醒厭厭共相思無力人語定小窗風雨暮寒  
岑寂繡被留歡香未滅錦書封淚紅猶濕問寸腸能  
著幾多愁朝還夕 春草遠春江碧雲黯淡花狼藉  
更柳綿閑颺柳絲難織入夢終疑神女賦寫情除有  
文通筆恨伯勞東去燕西飛空相憶

### 石州慢

赴召史館與德新丈別去岳祠西新店  
昨日以此寄之

擊筑行歌按馬賦詩年少豪舉從渠里社浮沉枉笑  
人間兒女生平王粲而今憔悴登樓江山信美非吾  
土天地一飛鴻渺翩翩何許 羈旅山中父老相逢  
應念此行良苦幾爲虛名誤却東家雞黍漫漫長路  
蕭蕭兩鬢黃塵騎驢漫與行人語詩句欲成時滿西  
山風雨

### 洞仙歌

黃塵鬢髮六月長安道羞向清溪照枯槁似山中遠  
志謾出山來成箇甚只是人間小草 昇平十二策  
丞相封侯說與高人應笑倒對清風明月展放眉頭  
長恁地大醉高歌也好待都把功名付時流只求箇

天公放教空老

江神子夢德新丈因及欽叔舊遊

河山亭上酒如川玉堂仙重留連猶恨春風桃李負  
芳年燕語鶯啼花落處歌扇後舞衫前舊遊風月  
夢相牽路三千去無緣滅沒飛鴻一線入秋烟白髮  
故人今健否西北望一潸然

又觀別

旗亭誰唱渭城詩酒盈卮兩相思萬古垂楊都是折  
殘枝舊見青山青似染緣底事淡無姿情緣不到  
木腸兒鬢成絲更須辭只恨芙蓉秋露冷胭脂爲問  
世間離別淚何日是滴休時

臨江仙自洛陽往孟津道中作

今古北邙山下路黃塵老盡英雄人生長恨水長東  
幽懷誰共語遠目送歸鴻蓋世功名將底用從前  
錯怨天公浩歌一曲酒千鍾男兒行處是未要論窮  
通

又寄德新丈

自笑此身無定在北州又復南州買田何日遂歸休  
向來凡落落此去亦悠悠赤日黃塵二百里嵩丘  
幾度登樓故人多在玉溪頭清泉明月曉高樹亂蟬

秋

又內鄉北山

夏館秋林山水窟家家林影湖光三年閑爲一官忙  
簿書愁裏過筍蕨夢中香 父老書來招我隱臨流  
已蓋茅堂白頭兄弟共論量山田尋二頃他日作桐  
鄉

鵲橋仙

梨花春暮垂楊秋晚歸袖無人重挽浮雲流水十年  
間算只有青山在眼 風臺月榭朱脣檀板多病全  
疎酒盞劉郎爭得似當時比前度心情又減

鷓鴣天隆德故宮同希顏欽叔知幾諸人賦

臨錦堂前春水波蘭臯亭下落梅多三山宮闕空銀  
海萬里風埃暗綺羅 雲子酒雪兒歌留連風月共  
婆娑人間更有傷心處奈得劉伶醉後何

又

華表歸來老令威頭皮留在姓名非舊時逆旅黃梁  
飯今日田家白板扉 沽酒市釣魚磯愛閑直與世  
相違墓頭不要征西字元是中原一布衣

太常引東原上清宮同楊飛卿夜話汝梁舊遊

追懷欽叔內翰

詞

綜 卷二十六

十一 中華書局聚

十年流水共行雲相見重情親  
滄海內揚塵便疑是前身  
後身風臺月榭舞裙歌扇  
樂事幾回新莫話洛陽春  
更誰似金鑿故人

清平樂憶鎮陽

悲歡聚散世事天誰管  
梳去梳來雙鬢短鏡裏看看  
雪滿燕南十月霜寒孤身  
去住都難何日西窗燈  
火眼前兒女團圓

又

離腸宛轉瘦覺妝痕淺  
飛去飛來雙乳燕消息知郎  
近遠樓前小雨珊珊海棠  
簾幕輕寒杜宇一聲春  
去樹頭無數青山

邁陂塘太和五年乙丑歲赴試并州道逢捕鴈

者云今日獲一鴈殺之矣其脫網者悲  
鳴不能去竟自投于地而死予因買得  
之葬之汾水之上累石為識號曰鴈丘  
并作鴈丘詞

問世間情是何物直教生死相許  
天南地北雙飛客老翅幾回寒暑  
歡樂趣離別苦就中更有癡兒女  
君應有語渺萬里層雲千山暮雪  
隻影向誰去橫汾路寂寞當年  
簫鼓荒烟依舊平楚招魂楚些  
何嗟及

山鬼暗啼風雨天也妒未信與鶯兒燕子俱黃土千  
秋萬古爲留待騷人狂歌痛飲來訪鴈丘處

點絳脣

醉裏春歸綠窗猶唱留春住問春何處花落鶯無語  
渺渺予懷漠漠烟中樹西樓暮一簾疎雨夢裏尋  
春去

江月晃重山 初到嵩山作

塞上秋風鼓角城頭落日旌旗少年鞍馬適相宜從  
軍樂莫問所從誰 候騎纔通冀北先聲已動遼西  
歸期猶及柳依依春閨月紅袖不須啼

王予可字南雲吉州人

生查子

夜色靜明河風好來千里水殿謫仙人皓齒清歌起  
前聲金竿中後調銀河底一夜嶺頭雲繞遍樓前  
水

鄧千江 臨洮人

望海潮 獻張六太尉

雲雷天塹金湯地險名藩自古臯蘭營屯繡錯山形  
米聚襟喉百二秦關鏖戰血猶殷見陣雲冷落時有  
雕盤靜塞樓頭曉月依舊玉弓彎 看看定遠西還

有元戎闔令上將齋壇區脫晝空兜鈴夕解甘泉又  
報平安吹笛虎牙間且宴陪珠履歌按雲鬢招取英  
靈毅魄長繞賀蘭山陶九成云近世所謂大曲蘇小  
小蝶戀花蘇東坡念奴嬌晏叔原鷓鴣天柳耆卿雨  
淋鈴辛稼軒摸魚子吳彥高春草碧蔡伯堅石州慢  
張子野天仙子朱淑真生查子鄧千江望海潮

詞綜卷二十六



元詞五十三首

許衡一首

張弘範一首

劉秉忠一首

燕公楠一首

程鉅夫四首

盧摯一首

劉敏中一首

楊果一首

仇遠二首

李冶三首

王渾八首

趙孟頫五首

劉因二首

梁曾一首

陳孚二首

汪宗臣一首

姚雲文四首

詹正四首

吳澄一首

彭元遜四首

羅志仁四首

韋居安一首

許

衡字仲平河內人被召為京兆提學累官集

賢大學士兼國子祭酒領太史院事贈榮

祿大夫司徒謚文正加贈太傅開府儀同

三司魏國公從祀孔子廟庭有魯齋先生

集

滿江紅別大名親舊

河上徘徊未分袂孤懷先怯中年後此般憔悴怎禁

離別淚苦滴成襟  
畔濕愁多擁就心  
頭結倚東風搔  
首謾無聊情難說  
黃卷在消白日青  
鏡裏增華髮  
念歲寒交友故山  
烟月虛負人生歸  
去好誰知美事  
難雙得計從今佳  
會幾何時長相憶

張弘範

字仲疇定興人官至鎮國上將軍江東道

宣慰使贈銀青榮祿大夫平章政事謚武

略加贈太師開府儀同三司上柱國齊國

公改謚忠武延祐中追封淮陽王更謚獻

武

臨江仙憶舊

千古武陵溪上路  
桃源流水潺潺  
可憐仙侶剩濃歡  
黃鸝驚夢破青鳥  
喚春還  
回首舊遊渾不見  
蒼烟一片荒山  
玉人何處倚闌干  
紫簫明月底翠袖  
暮雲寒

劉秉忠

字仲晦邢州人少為僧隨其師海雲入見

世祖遂留之從代宗時人稱為聰書記至

元初拜光祿大夫位太保參預中書省事

卒贈太師封趙國公謚文貞成宗時加贈

太師謚文正仁宗時進封常山王有藏春

散人集

乾荷葉

乾荷葉色蒼蒼老柄風搖蕩減清香越添黃都因昨夜一番霜寂寞秋江上

燕公楠字國材江州人至元初辟贛州通判累官

資德大夫湖廣行中書省右丞有五峯集

摸魚兒 答程雪樓見壽

又浮生平頭六十登樓悵望荆楚出山小草成何事  
閑却竹烟松雨空自許早搖落江潭一似琅琊樹蒼  
蒼天路謾伏櫪心長銜圖志短歲晏欲誰與 梅花  
賦飛墮高寒玉宇鐵腸還解情語英雄操與君侯耳  
過眼羣兒誰數霜鬢縷祇夢聽枝頭翡翠催歸去清  
觴飛羽且細酌盱泉酣歌郢雪風致美無度

程鉅夫原名文海避武宗諱以字行其先休甯人

後徙居郢至銀夫始遷建昌仕世祖官翰

林學士承旨贈光祿大夫追封楚國公謚

文憲有雪樓集詞一卷

摸魚兒 壽燕五峯右丞

記江梅向來輕別相逢今又平楚東風小試南枝暖  
早已千林烟雨春幾許向五老仙家移下瓊瑤樹溪  
橋驛路更月曉堤沙霜秋野水疎影自容與 平生

事幾度含章殿宇隔花么鳳能語苔枝天矯蒼龍瘦  
誰把冰鬚細數千萬縷簇一點芳心待與和羹去移  
宮換羽且度曲傳觴主人花下今日慶初度

又次韻盧疎齋題歲寒亭

問疎齋湘中朱鳳何如江上鸚鵡波寒木落人千里  
客裏與誰同住茅屋趣吾自愛吾亭更愛參天樹勞  
君為賦渺雪鴈南飛雲濤東下歲晏欲何處 疎齋  
老意氣經文緯武平生握手相許江南江北尋芳路  
共看碧雲來去黃鸝舉記我度秦淮君正臨清句宣  
城水名歌聲緩與怕徑竹能醒庭花起舞驚散夜來  
雨

點絳脣送王蓋臣

綠鬢青雲王郎故是乘驄侶阿龍風度想在烏衣住  
帶得春來又共春歸去江頭路美人何處官柳吹  
風絮

清平樂 西野使君自遼左寄詩詞至灤陽猥承

見及次韻代訊

新來酒戶想勝看花處帶得春行平壤路同笑同歌  
同住 灤陽却近山家芒鞋夜夜丹霞流水落花歸  
思蒼烟白石生涯

盧

摯

字處道號疎齋涿州人仕至翰林學士元初稱能詩者以劉因盧摯為首有疎齋集

摸魚兒題雪樓先生歲寒亭詩卷

為君歌歲寒亭子無煩洲畔鸚鵡江山勝概風霜地  
要近魯東家住丘壑趣應素愛昂霄老柏孤松樹登  
高作賦想白雪陽春碧雲日暮別有倚樓處 金閨  
彥尚憶西清接武年來喬木如許團茅時復羲皇上  
我醉欲眠卿去歌欲舉還自悟君家琢就瓊瑤句疎  
齋試與倩倚竹佳人相絃赴節涼滿北窗雨

劉敏中章丘人至元中為監察御史累遷翰林學士承旨卒謚文簡有中齋集

點絳脣寄程雪樓

短夢驚回北窗一陣芭蕉雨雨聲還住斜日明高樹  
起望行雲送雨前山去山如霧斷虹猶怒直入山  
深處

楊

果字正卿號西菴蒲陰人金正大中進士入

元為北京宣撫使拜參知政事出為淮孟路總管卒謚文獻有集

摸魚兒同遺山賦鴈丘

悵年年鴈飛汾水秋風依舊蘭渚網羅驚破雙棲夢

詞

綜卷二十七

三二中華書局聚

孤影亂翻波素還碎羽算古往今來只有相思苦朝  
朝暮暮想塞北風沙江南烟月爭忍自來去埋恨  
處依約并門舊路一丘寂寞寒雨世間多少風流事  
天也有心相妒休說與還却怕有情多被無情誤一  
杯會舉待細讀悲歌滿傾清淚爲爾醉黃土

仇

遠

字仁近錢塘人官溧陽州儒學教授一時

遊其門者若張雨張翥莫維賢皆有名當世所著有山村集

八犯玉交枝 招寶山觀月上

滄島雲連綠瀛秋入暮景却沉洲渚無浪無風天地  
白聽得潮生人語擎空孤柱翠倚高閣憑虛中流蒼  
碧迷烟霧惟見廣寒門外青無重數不知是水是  
山不知是樹漫漫知是何處倩誰問凌波輕步謾疑  
睇乘鸞秦女想庭曲霓裳正舞莫須長笛吹愁去怕  
喚起魚龍三更噴作前山雨

齊天樂 賦蟬

夕陽門巷荒城曲清音早鳴秋樹薄剪綃衣涼生鬢  
影獨飲天邊風露朝朝暮暮奈一度淒吟一番淒楚  
尚有殘聲驀然飛過別枝去齊宮往事謾省行人  
猶與說當時齊女雨歇空山月籠古柳彷彿舊曾聽

處離情正苦甚懶拂冰箋倦拈琴譜滿地霜紅淺莎  
尋蛻羽

李

冶字仁卿樂城人金進士辟知鈞州事城潰

微服北渡流落忻崞間世祖聞其賢召之  
未仕晚家封龍山下至元初再以學士召  
就職暮月以老病辭去有敬齋集

邁陂塘和元遺山鴈丘

鴈雙雙正分汾水回頭生死殊路天長地久相思債  
何似眼前俱去摧勁羽倘萬一幽冥却有重逢處詩  
翁感遇把江北江南風嘹月唳并付一丘土仍爲  
汝小草幽蘭麗句聲聲字字酸楚拍江秋影今何在  
宰木欲迷隄樹霜魂苦算猶勝王嬙青塚真娘墓憑  
誰說與對鳥道長空龍艘古渡馬耳淚如雨

又大名有男女以私情不遂赴水者後三日二

尸相攜出水濱是歲陂荷俱並蒂

爲多情和天也老不應情遽如許請君試聽雙藻怨  
方見此情真處誰點注香灑灑銀塘對抹胭脂露藕  
絲幾縷絆玉骨春心金沙曉淚漠漠瑞紅吐連理  
樹一樣驪山懷古古今朝暮雲雨六郎夫婦三生夢  
幽恨從來艱阻須念取共鴛鴦翡翠照影長相聚秋

風不住悵寂寞芳魂輕烟北渚涼月又南浦

鷓鴣天中秋同遺山飲倪文仲家蓮花白醉中

賦此

太乙滄波下酒星露醺祕訣出仙局情知天上蓮花  
白壓盡人間竹葉青 迷晚色散秋馨兵廚曉溜玉  
泠泠楚江雲錦三千頃笑殺靈均語獨醒

王

惲字仲謀汲縣人官至翰林學士嘉議大夫

累進中奉大夫贈翰林學士承旨資善大

夫追封太原郡公謚文定有秋澗集詞四

卷

春從天上來見故宮人感賦

羅綺深宮記紫袖雙垂當日昭容錦封香重彤管春  
融帝座一點雲紅正臺門事簡更捷奏清晝相同聽  
鈞天侍瀛池內宴長樂歌鐘 回頭五雲雙闕恍天  
上繁華玉殿珠櫳白髮歸來昆明灰冷十年一夢無  
踪寫杜娘哀怨和淚點彈與孤鴻淡長空看五陵何  
似無樹秋風

點絳脣送董秀才西上

楊柳青青玉門關外三千里秦山渭水未是消魂地  
坦臥東牀恐滅風雲氣功名際願君著意莫搵春



閨淚

水龍吟 賦秋日紅梨花

纖苞淡貯幽香玲瓏輕鎖秋陽麗仙根借煖定應不  
待荆王翠帔瀟灑輕盈玉容渾是金莖露氣甚西風  
宛轉東欄暮雨空點綴真如淚 誰遣司花妙手又  
一番角奇爭異使君高臥竹亭閑寂故來相慰燕几  
螺屏一枝披拂繡簾風細約洗妝快瀉玉屏芳酒枕  
秋蟾醉

平湖樂

採蓮人語隔秋烟波靜如橫練入手風光莫流轉共  
留連 畫船一笑春風面江山信美終非吾土問何  
日是歸年

又

秋風湖上水增波水底雲陰過憔悴湘纍莫輕和且  
高歌 凌波幽夢誰驚破佳人望斷碧雲暮合道別  
後意如何

又

安仁雙鬢已驚秋更甚眉頭皺一笑相逢且開口玉  
爲舟 新詞淡似鵝黃酒醉歸扶路竹西歌吹人道  
似揚州

詞

綜 卷二十七

五 中華書局聚

又

秋風嫋嫋白雲飛人在平湖醉雲影湖光淡無際錦  
屏圍 故人遠在千山外百年心事一樽濁酒長使  
此心違

後庭花破子晚眺臨武堂

綠樹遠連洲青山壓樹頭落日高城望烟霏翠滿樓  
木蘭舟彼汾一曲春風佳可遊

趙子孟頫

字子昂宋太祖子秦王德芳之後四世祖  
伯圭賜第湖州遂為湖州人宋末為真州

司戶參軍至元中以程鉅夫薦入見授兵

部郎中累官翰林學士承旨榮祿大夫卒

追封魏國公謚文敏有松雪詞一卷

邵復孺云公以承平王孫而嬰世變黍離  
之悲有不能忘情者故長短句深得騷人  
意度

後庭花破子

清溪一葉舟芙蓉兩岸秋採菱誰家女歌聲起暮鷗  
亂雲愁滿頭風雨帶荷葉歸去休

蝶戀花

儂是江南遊冶子烏帽青鞋行樂東風裏落盡楊花

春滿地萋萋芳草愁千里 扶上蘭舟人欲醉日暮  
青山相映雙蛾翠萬頃湖光歌扇底一聲吹下相思  
淚

虞美人 浙江舟中作

潮生潮落何時了 斷送行人老 消沉萬古意無窮盡  
在長空澹澹鳥飛中 海門幾點青山小 望極烟波  
渺 何當駕我以長風 便欲乘桴浮到日華東

浣溪沙

李叔固丞相會間贈歌者貴貴

滿捧金卮低唱詞樽前再拜索新詩 老夫慚愧鬢成  
絲 羅袖染將修竹翠粉香須上小梅枝 相逢不似  
少年時

浪淘沙

今古幾齊州 華屋山丘 杖藜徐步立芳洲 無主桃花  
開又落 空使人愁 沙上往來舟萬事悠悠 春風曾  
見昔人遊 惟有石橋橋下水依舊 東流

劉

因字夢吉 容城人 至元中徵授承德郎 右贊

善大夫 以母疾歸 尋以集賢學士嘉議大  
夫徵 固辭 卒 贈翰林學士 資善大夫 護軍  
追封容城郡公 謚文靖 有靜脩集詞一卷

木蘭花

詞

綜 卷二十七

六 中華書局聚

未開常探花開未又恐纔開風雨至花開風雨不相  
妨爲甚不來花下醉 今年休作明年計明日已非  
今日事春風欲勸坐中人一片落紅當眼墜

鵲橋仙喜雨

紆干生處幾時飛去欲去被天留住野人得飽更無  
求滿意看一犁春雨 田家作苦濁醪釀黍准備歲  
時歌舞不妨分我一豚蹄更試聽清秋社鼓

梁

曾字貢父燕人以薦起歷官湖南宣慰司副

使改淮西宣慰司副使兩使安南授吏部  
尚書改授淮安路總管累遷昭文館大學  
士資德大夫

木蘭花慢西湖送春

問花花不語爲誰落爲誰開算春色二分半隨流水  
半入塵埃人生能幾歡笑但相逢尊酒莫相推千古  
幕天席地一春翠繞珠圍 彩雲回首暗高臺烟樹  
渺吟懷攬一醉留春留春不住醉裏春歸西樓半簾  
斜日怪銜春燕子却飛來一枕青樓好夢又教風雨  
驚回

陳

孚字剛中臨海人至元中官翰林待制兼國

史院編修繼出爲台州路總管府治中有

太常引端陽日當母誕不得歸

綵絲堂上簇蘭翹記生母在今朝無地捧金蕉奈烟  
水龍沙路遙碧天迢遞白雲何處風急雨瀟瀟萬  
里夢魂消待飛逐錢唐夜潮

又

短衣孤劍客乾坤奈無策報親恩三載隔晨昏更疎  
雨寒燈斷魂赤城霞外西風鶴髮猶想倚柴門蒲  
醕謾盈尊倩誰寫青衫淚痕

汪宗臣字公輔號紫巖婺源人與方虛谷交善有  
集四卷

蝶戀花清明前兩日聞燕

年去年來來去早怪底不來庭院春光老知向誰家  
翻別調家家望斷飛踪杳千里瀟湘烟渺渺不記  
雕梁舊日恩多少逼近清明纔一到故巢猶在朱檐  
曉

姚雲文字聖瑞高安人宋咸淳進士入元授承直

郎撫建兩路儒學提舉有江村遺稿

摸魚兒良岳

渺人間蓬瀛何許一朝飛入梁苑朝川梯洞層崖出

猶帶鬼愁龍怨窮遊宴談笑裏金風吹折桃花扇翠  
華天遠悵莎沼螢粘錦屏烟合草露泣蒼蘚 東華  
夢好在牙檣瑠輦畫圖歷歷曾見落紅萬點孤臣淚  
斜日牛羊春晚摩雙眼看塵世鰲宮又報鯨波淺吟  
鞭拍斷便乞與媧皇化成精衛填不盡遺憾

紫萸香慢九日

近重陽偏多風雨絕憐此日暄明問秋香濃未待攜  
客出西城正自羈懷多感怕荒臺高處更不勝情向  
樽前又憶漉酒插花人只坐上已無老兵 淒清淺  
醉還醒愁不肯與詩平記長楸走馬雕弓捲柳前事  
休評紫萸一枝傳賜夢誰到漢家陵儘烏紗便隨風  
去要天知道華髮如此星星歌罷涕零

玲瓏玉半閑堂賦春雪

開歲春遲早贏得一白瀟瀟風窗浙簌夢驚錦帳春  
嬌是處貂裘透暖任尊前回舞紅倦柔腰今朝虧陶  
家茶鼎寂寥 料得東皇戲劇怕蛾兒街柳先鬪元  
宵宇宙低迷倩誰分淺亞深凹休嗟空花無據便直  
箇瓊雕玉琢總是虛飄且沉醉趁樓頭零片未消

齊天樂

柳花引過橫塘路縈回曲蹊通圃插槿編籬挨梅砌

石次第海棠成塢吟筇獨拄待尋訪斜橋水邊窺戶  
已約青山雲深不礙客來處 繁華閱人無數問舊  
日平原君還知否啼鳥窗幽晝陰人寂慵困不如飛  
絮匆匆燕語似迎得春來且留春住惜取名花一枝  
堪寄與

詹 正一作玉字可大別號天游鄧人官翰林學

士

霓裳中序第一 至元間監醮長春宮見羽士丈

室古鏡狀似秋葉背有金刻宣和御寶四

字有感因賦

一規古蟾魄曾過宣和幾春色知那箇柳鬆花法曾  
搓玉團香塗雲抹月龍章鳳刻是如何兒女消得便  
孤了翠鸞何限人更在天北 磨滅古今離別幸相  
從薊門仙客蕭然林下 秋葉對雲淡星疎眉青影白  
佳人已傾國謾贏得癡銅舊畫興亡事道人知否見  
了也華髮

二姝媚 古衛舟子謂曾載錢唐宮人

一篷兒別苦是誰家花天月地兒女紫曲藏嬌慣錦  
窠金翠玉璫鐘呂綺席傳宣笑聲裏龍樓三鼓歌扇  
題詩舞袖籠香幾曾塵土 因甚留春不住怎知道

詞

綜 卷二十七

八中華書局聚

人間匆匆今古金屋銀屏被西風吹換蓼汀蘋渚如此江山應悔却西湖歌舞載取斷雲何處江南烟雨  
齊天樂贈童甕天兵後歸杭

相逢喚醒京華夢吳塵暗班吟髮倚擔評花認旗沽酒歷歷行歌奇跡吹香弄碧有坡柳風情逋梅月色畫鼓紅船滿湖春水斷橋客  
當時何限俊侶甚花天月地人被雲隔却載蒼烟更招白鷺一醉修江又別今回記得再折柳穿魚賞花催雪如此湖山忍教人更說

清平樂

醉紅宿翠髻鞦韆烏雲墜管是夜來渾不睡那更今朝早起  
東風滿搦腰肢階前小立多時却恨一番新雨想應濕透鞋兒

吳

澄字幼清崇安人仕至翰林學士追封臨川

郡公謚文正學者稱草廬先生有詞一卷

渡江雲揭浩齋送春和韻

名園花正好嬌紅帶白百態競春妝笑痕添酒暈豐臉凝脂誰與試鉛霜詩朋酒伴趁此日流轉風光儘夜遊不妨秉燭未覺是疎狂  
茫茫一年一度爛慢離披似長江去浪但要教啼鶯語燕不怨盧郎問春



春道何曾去任蜂蝶飛過東牆君看取年年潘令河陽

彭元遜字異吾廬陵人

漢宮春元夕

十日春風又一番調弄怕暖愁陰夜來風雨搖得楊柳黃深薰篝未斷夢舊寒殘醉同衾便是聞燈見月看花對酒驚心攜手滿身花影香霏冉冉露濕羅襟笙歌行人歸去回首沉沉人間此夜誤春光一刻千金明日問紅巾青鳥蒼苔自拾遺簪

玉女迎春慢柳

纔入新年逢人日拂拂淡烟無雨葉底妖禽自語小啄幽香還吐東風辛苦便怕有踏青人誤清明寒食消得渡江黃翠千縷看臨小帖宜春填輕暈濕碧花生霧爲說釵頭裊裊繫著輕盈不住問郎留否似昨夜教成鸚鵡走馬章臺憶得畫眉歸去

子夜歌和劉尚友韻

視春衫篋中半在浥浥酒痕花露恨桃李隨風吹盡夢裏故人如霧臨穎美人秦川公子却共何人語對誰家花草池臺回首故園咫尺未成歸去昨宵聽危絃急管酒醒不知何處漂泊情多衰遲感易無限

詞

綜卷二十七

九一中華書局聚

堪憐許似尊前眼底紅顏消幾寒暑年少風流未諳  
春事追與東風賦待他年君老巴山共君聽雨

解珮環

江空不渡恨靡蕪杜若零落無數遠道荒寒婉婉流  
年望望美人遲暮風烟雨雪陰晴晚更何須春風千  
樹盡孤城落木蕭蕭日夜江聲流去日宴山深聞  
笛恐他年流落與子同賦事關心違交淡煤勞蔓草  
沾衣多露汀洲窈窕餘醒寐遺珮浮沉澧浦有白鷗  
淡月微波寄語逍遙容與

羅志仁號壺秋涂川人

霓裳中序第一 四聖觀

來鴻又去燕看罷江潮收畫扇謾湖曲雕欄倦倚正  
船過西陵快篙如箭凌波不見但陌花遺曲淒怨孤  
山路晚蒲病柳淡綠鎖深院離恨五雲宮殿記舊  
日曾遊翠輦青紅如寫便而悵下鷓池荒放鶴人遠  
粉牆隨岸轉漏壁瓦殘陽一線蓬萊夢人間那信坐  
看海濤淺

風流子 泛湖

歌咽翠眉低湖船客尊酒謾重攜正斷續齋鐘高峯  
南北飄零野褐太乙東西淒涼處翠連松九里馬

濺障泥葛嶺樓臺夢隨烟散吳山宮闕恨與雲齊  
靈峯飛來久飛不去有落日斷猿啼無限風荷廢港  
露柳荒畦歎岳公英骨麒麟舊塚坡仙吟魄鶯燕長  
堤欲弔梅花無句素壁慵題

金人捧露盤唐懷古

濕苔青妖血碧壞垣紅怕精靈來往相逢荒烟瓦礫  
寶釵零亂隱鸞龍吳峯越巘翠壘鎖若爲誰容  
浮屠換朝陽殿僧磬改景陽鐘興亡事淚老金銅驪山  
廢盡更無宮女說玄宗海濤落月魚聲起滿眼秋風

虞美人人淨慈尼

君王曾惜如花面往事多恩怨霓裳和淚換袈裟又  
送鸞輿北去聽琵琶  
當年未削青螺髻知是歸期  
未天花交室萬緣空結綺臨春何處淚痕中

韋居安號梅澗

摸魚兒

繞茗城水平波渺雙湖遙睇無際就中惟有漁灣好  
占得西關佳致楊柳外羨汎宅浮家當日玄真子溪  
山信美歎陳迹猶存前賢已往誰會景中意  
蕭閑甚築屋三間近水汀洲香汎蘭芷清風明月知多少  
肯滯軟紅塵裏垂釣餌趁春水生時賸有桃花鱖煩

詞

綜卷二十七

十一中華書局聚

襟淨洗待辦取輕蓑來分半席相對弄清泚

一珍做宋版印

詞綜卷二十七

詞綜卷二十八

元詞五十四首

李琳二首

趙文三首

宋遠一首

周景一首

劉將孫一首

蕭列一首

司馬昂父一首

應法孫一首

王學文三首

彭芳遠一首

危復之一首

顏子俞一首

劉景翔一首

吳元可二首

劉鉉一首

蕭允之四首

黃子行五首

彭履道一首

李裕翁一首

段弘章一首

劉天迪三首

周伯陽一首

尹公遠一首

曾允元五首

李天驥一首

劉應幾一首

周孚先二首

尹濟翁一首

王從叔一首

蕭漢傑一首

彭泰翁一首

趙功可一首

戴山隱一首

姜个翁一首

李

琳號梅谿長沙人

六么令 京中清明

淡烟疎雨香逕渺啼鴉新晴畫簾閑卷燕外寒尤力  
依約天涯芳草染得春風碧人間陳迹斜陽今古幾  
縷遊絲趁飛蝶誰向尊前起舞又覺春如客翠袖  
折取薦紅笑與簪華髮回首青山一點簷外寒雲疊  
梨花著雨柳花飛絮絮夢繞欄干滿園雪

木蘭花慢 汴京

藥珠仙馭遠橫羽葆簇蛻旌甚鸞月流輝鳳雲布彩  
翠繞蓬瀛舞衣怯環珮冷問梨園幾度沸歌聲夢裏  
芝田八駿禁中花漏三更繁華一瞬化飛塵輦路  
劫灰平悵碧滅烟綃紅凋露粉寂寞秋城興亡事空  
陳迹只青山淡淡夕陽晴未向沙鷗說得柳風吹上  
旗亭

趙

文字儀可號青山廬陵人東湖書院山長

八聲甘州

和孔瞻懷信國公韻因念周亦躬

是去年春草又萋萋塵生縷金衣悵朱顏爲土白楊  
堪柱燕子誰依謾說漫漫六合無地著相思遼鶴歸  
來後城亦全非更有延平一劍向風雷半夜何處  
尋伊怪天天何物堪作玉彈棋到今年無腸堪斷向  
清明獨自掩荆扉何況又禽聲杜宇花事醅醅

瑞鶴仙 劉氏園柳

綠楊深似雨西湖上舊日愁絲恨縷風流似張緒羨  
春風依舊年年眉嫵宮腰楚楚倚畫欄曾鬪妙舞想  
如今似我零落天涯却悔相如 痛絕長秋別後楊  
白花飛舊腔誰譜年光暗度淒涼孰訴記菩提寺路  
段家橋水何時重到夢處况柔條老去爭奈繫春不  
住

塞翁吟

坐對梅花笑還記初度年時名利事總成非謾老矣  
何爲吳山夜月閩山霧回首鬢影如絲懶更問斗牛  
箕強憑醉成詩 閑思嗟漂泊浮雲飛絮曾跌蕩春  
風柘枝便萬里金臺築就已長分采藥龐公誓墓義  
之百年政爾一笑樽前兒女牽衣

宋

遠號梅洞涂川人

意難忘 同滕玉霄周秋陽劉尚友蕭高峯邂逅

古洪題樟鎮華光閣誌別分韻得重字

雞犬雲中笑種桃道士虛費春風山城看過鴈春水  
夢爲龍雲上下燕西東久別各相逢向夜深江聲浦  
樹燈影漁篷 舊遊新恨重重便十分談笑一樣飄  
蓬玄經推意氣丹鼎賺英雄年易老世無窮春事苦

匆匆更與誰題詩藥市沽酒新豐

周

景字秋陽南陽人

水龍吟前題得細字

人生能幾相逢百年四海為兄弟舊時青眼今番白  
髮年華隕涕春更無情拋人先去楊花無蒂况江程  
漸短別期漸緊須重把蘭舟繫幸自清江如砥指  
黃壚流鶯聲細滄波如許平蕪何處明朝迢遞何預  
興亡不如休去牆陰挑薺且相期共看蓬萊清淺更  
三千歲

劉將孫

字尚友廬陵人辰翁子

憶舊遊

前題得論字

正落花時節憔悴東風綠滿愁痕悄客夢驚呼伴侶  
斷鴻有約回泊歸雲江空共道惆悵夜雨隔篷聞儘  
世外縱橫人間恩怨細酌重論歎他鄉異縣渺舊  
雨新知歷落情真匆匆那忍別料當君思我我亦思  
君人生自非麋鹿無計久同羣此去重消魂黃昏細  
雨人閉門

蕭

列號高峯涂川人

八聲甘州前題得文字

可恰生飄零到茶蘼依然舊銷魂殘春幾許風風雨



兩客裏又黃昏無奈一江烟霧腥浪捲河豚身世忽  
如葉那自清渾莫厭悲歌笑語奈天涯有夢白髮  
無根怕相思別後無字寫回文更月明洲渚杜鵑聲  
裏立向臨分三生石情緣千里風月柴門

司馬昂父字九皋

最高樓

花信緊二十四番愁風雨五更頭侵堦苔蘚迴羅襪  
逗衣梅潤試香篝綠窗閑人夢覺鳥聲幽按秦箏  
學弄相思調寫幽情恨殺知音少向何處說風流一  
絲楊柳千絲恨三分春色二分休落花時流水裏兩  
悠悠

應法孫

霓裳中序第一和周草窗韻

愁雲翠萬疊露柳殘蟬空拘葉簾卷流蘇寶結乍庭  
戶嫩涼闌干微月玉纖勝雪委素紈塵鎖香篋思前  
事鶯期燕約寂寞向誰說悲切漏籤聲咽漸寒爐  
蘭缸未滅良宵長是間別恨酒凝紅綃粉粉琉璃鏡  
盟鸞影缺吹怨笛西風數闋無言久和衣成夢睡損  
縷金蝶

王學文字竹澗眉山入

摸魚兒送汪水雲之湘

記當年舞衫零亂淋鈴忍按新闕杜鵑枝上東風晚  
點點淚痕凝血芳信歇念初試琵琶曾識關山月悲  
絃易絕奈笑罷蠶生曲終愁在誰解寸腸結浮雲  
事又作南柯夢徹一簪聊寄華髮乾坤桑海無窮事  
才歷昆明初劫誰共說都付與焦桐寫入梅花疊黃  
花送別休更問湘魂獨醒何在沉醉浩歌發

綺寮怨

忽忽東風又老冷雲吹晚陰疎簾下茶鼎孤烟斷橋  
外梅豆千林江南庾郎憔悴睡未醒病酒愁怎禁倚  
闌干一扇涼風看平地落花如雪深千曲囊中古  
琴平泉金谷不堪舊事重尋當日登臨都化作夢銷  
沉元龍丘墳無恙誰喚起共論心哀歌怨吟問何似  
啼鳥枝上音

柳梢青友人至

客裏淒涼桐花滿地杜宇深山幸自君來誰教君去  
剪剪輕寒愁懷無語相看謾寫入徽絃自彈小院  
黃昏前村風雨莫倚闌干

彭芳遠

滿江紅聞笛

愁滿關山又吹得蘆花雪深西樓外天低水湧龍挾  
泓吟回首人間無此曲數峯江上落餘音似斷雲飛  
絮兩悠悠何處尋 江南路晴又陰聲韻改淚盈襟  
自中郎去處羽泛商沉牛背斜陽添別恨鸞膠秋月  
續琴心待醉騎黃鶴度蒼寒霜滿林

危復之撫州人元帥郭昂薦爲儒學官不就至元  
中累徵不應隱紫霞山中卒私謚貞白先  
生

### 永遇樂

早葉初鶯晚風孤蜨幽思何限檐角縈雲階痕積雨  
一夜苔生徧玉窗閑掩瑤琴慵理寂寞水沈烟斷悄  
無言春歸無覓卷簾見雙飛燕 風亭泉石烟林薇  
蕨夢繞舊時曾見江上閑鷗心盟猶在分得眠沙畔  
引觴浮月飛談卷霧莫管愁深歡淺起來倚闌干拾  
得殘紅一片

顏子俞號吟竹太和人

### 清平樂 留王靜得

留君少住且待晴時去水鶴夜深雲外語明日棠梨  
花雨 尊前不盡餘情都上鳴絃細聲二十四番風  
後綠陰芳草長亭

劉景翔號溪山安成人

如夢令

獨立荷汀烟暮一霎錦雲香雨似爲我無情驚起鴛鴦飛去飛去飛去却在綠楊深處

吳元可字山庭吉安人

鳳凰臺上憶吹簫

更不成愁何曾是醉豆花雨後輕陰似此心情自可多了閑吟秋在西樓西畔秋較淺不似情深夜來月爲誰瘦小塵鏡羞臨彈箏舊家伴侶記鴈啼秋水下指成音聽未穩當時自誤又况如今那是柔腸易斷人閒事獨此難禁雕籠近數聲別似春禽

采桑子

江南二月春深淺芳草青時燕子來遲剪剪輕寒不滿衣清宵欲寐還無寐顧影顰眉整帶心思一樣東風兩樣吹

劉 鉉字鼎玉

烏夜啼 石榴

垂楊影裏殘紅甚匆匆只有榴花全不怨東風暮雨急曉霞濕綠玲瓏比似茜裙初染一般同

蕭允之號竹屋

蝶戀花舟行懷舊

十幅歸帆風力滿記得來時買酒朱橋畔遠樹平蕪  
空目斷亂山惟見斜陽半誰把新聲翻玉筦吹過  
滄浪多少傷春怨已是客懷如絮亂畫樓人更回頭  
看

虞美人

朱樓曾記阿嬌眄滿座春風轉紅潮生面酒微醺一  
曲清歌留住半牕雲大都咫尺無消息望斷青鸞  
翼夜長香短燭花紅多少思量只在雨聲中

點絳脣

花徑相逢眼期心諾情如昨怕人疑著佯弄鞦韆索  
知有而今何似當初莫愁難託雨鈴風鐸夢斷燈  
花落

瑣寒窗

細雨收塵輕陰弄日柳絲掠道桃邊杏處猶記玉驄  
曾到對東風回首舊游香消艷歇無音耗悵佳人有  
約難來綠遍滿庭芳草愁抱沉吟久問翠珥金鈿  
爲何人好回文細字塵暗當年纖縞倚闌干斜陽又  
西歡期易失春易老待何時再覓珍叢共把清尊倒  
黃子行號蓬壺

西湖月自度商調

湖光冷浸玻璃蕩一餉薰風小舟如葉藕花十丈雲  
梳霧洗翠嬌紅怯壺觴圍坐處正酒醪吹波潮暈頰  
尚記得玉臂生涼不放汗香輕淡 殢人小摘牆榴  
爲碎招猩紅細認裙褶舊遊如夢新愁似織淚珠盈  
睫秋娘風味在怎得對銀缸生笑靨消瘦沈約詩腰  
彷彿堪捻

又探梅

初弦月挂林梢又一度西園探梅消息粉牆朱戶苔  
枝露蕊淡勻輕飾玉兒應有恨爲悵望東昏相記憶  
便解珮飛入雲階長伴此花傾國 還嗟瘦損幽人  
記立馬攀條倚欄橫笛少年風味拈花弄蕊愛香憐  
色揚州何遜在試點染吟箋留醉墨謾贏得疎影寒  
牕夜深孤寂

滿江紅 歸自湖南題富春館

津鼓匆匆猶記得故人相送春江上烏啼花影馬嘶  
香鞞情逐陽關金縷斷淚和楊柳春絲重算別來幾  
度月明時相思夢 山萬疊秋眉聳春一點歸心動  
問風傳月侶有誰遊從百里家山明日到一尊芳酒  
今宵共任樓頭吹盡五更風梅花弄

花心動落梅

誰倚青樓把謫仙長笛數聲吹裂一片乍零千點還  
飛正是雨晴時節水晶簾外東風起卷不盡滿庭春  
雪畫欄小斜鋪亂颭翠苔成纈 媚媚餘香未歇空  
悵望音塵兩眉愁切翠袖淚乾粉額妝寒此恨有誰  
同說江南春信無痕跡餘情在冷烟殘月夢魂遠蘭  
燈伴人易滅

小重山

一點斜陽紅欲滴白鷗飛不盡楚天碧漁歌聲斷晚  
風急攬蘆花飛雪滿林濕 孤館百憂集家山千里  
遠夢難覓江湖風月好收拾故溪雲深處著蓑笠

彭履道

蘭陵王

章臺路西出重城幾步秦樓曉花氣分明一霎空濛  
洗高樹行人半倚戶飛去黃鸝自語秋千小不繫柳  
條惟有輕陰約飛絮 鈿車暗相遇早拂拭紅巾初  
放鸚鵡聞歌猶是淋鈴處喚鳴箏掩面倚壚呼酒東  
風重記舊眉嫵報伊共歌舞 西去屢回顧漸客舍  
荒涼嘶馬先駐玉關萬里知何許但倦擁荒澤瓜洲  
難渡將軍垂老望故國夜夢苦

李裕翁

摸魚兒

訝江南許多風景繁華只在晴晝些兒淡沲冲融意  
到處拈花著柳疎雨後更艷艷綿綿潑眼濃如酒飛  
浮宇宙但借日浮香隨風著物巧筆畫難就 惆悵  
處曾記蘇堤攜手十年驚覺回首蒼埃霽景成陰晦  
湖水湖烟依舊凝望久問燕燕鶯鶯識此年華否長  
門別有脈脈斷腸人柔情蕩漾長是爲伊瘦

段弘章號懶融吉州人

洞仙歌 茶蘼

一庭晴雪了東風孤注睡起濃香占牕戶對翠蛟盤  
雨白鳳迎風知誰見愁與飛紅流處 想飛瓊弄玉  
共駕蒼烟欲向人閒挽春住清淚滿檀心如此江山  
都付與斜陽杜宇是曾約梅花帶春來又自趁梨花  
送春歸去

劉天迪字雲閑西昌人

齊天樂 嚴縣尹席上和李觀我韻

瑞麟香軟飛瑤席吟仙笑陪歡宴桐影吹香梅陰弄  
碧一味晚涼堪薦停杯緩勸記羅帕求詩琵琶遮面  
十載揚州夢回前事楚雲遠 人生總是逆旅但相



逢一笑如此何限采石宮袍沉香醉筆何似輕衫小  
扇流年暗換甚新雨情懷故園心眼明日西江斜陽  
帆影轉

一萼紅夜聞南婦哭北夫

擁孤衾正朔風淒緊氈帳夜驚寒春夢無憑秋期又  
誤迢遞烟水雲山斷腸處黃茅瘴雨恨驄馬憔悴只  
空還揉翠盟孤啼紅怨切暗老朱顏 堪歎揚州十  
載甚倡條冶葉不省春殘蔡琰悲笳昭君怨曲何預  
當日悲歡謾贏得西鄰倦客空惆悵今古上眉端夢  
破梅花角聲又報更闌

虞美人

子規解勸春歸去春亦無心住江南風景正堪憐到  
得而今不去待何年 無端往事縈心曲兩鬢先驚  
綠薔薇花發望春歸謝了薔薇又見棟花飛

周伯陽字霽海

摸魚兒

又匆匆月鞭露鐙梅花江上歸路海圖破碎來時線  
何似彩衣低舞風雪暮正望斷青山一髮雲橫處浩  
歌獨舉便想見迎門牽衣兒女總是舊眉嫵 陽關  
曲揮灑紫薇花露妙音清遠高駐經寒楊柳休輕折

搖動一溪霜霧邯鄲步笑布襪青鞋去住知何許汀  
鷗沙鷺若問我重來明年有約今日是前度

尹公遠號琴泉

尉遲盃題盧古溪響碧琴所

冰絃語在竹樹院落深深處當年野草閑花何許浮  
雲飛絮征鴻止止縱汗漫遊人遠回顧遲瓊樓五色  
簾開喚醒玄鶴飛舞何事夢斷湖山尚九里松聲  
八月潮怒三十年餘臺池淚應不爲花奴羯鼓想天  
上羣仙老矣甚比似人間更愁苦倩畫欄留住西風  
莫教吹入雲去古溪琴操浙音故云

曾允元字舜卿號鷗江太和人

月下笛 次韻

吹老楊花浮萍點一溪春色閑尋舊迹認溪頭浣沙  
磧柔條折盡成輕別向空外瑤簪一擲算無情更苦  
鶯巢暗葉啼破幽寂凝立闌干側記露飲東園聯  
鑣西陌容銷鬢減相逢應是難識東風吹得愁似海  
漫點染空堦自碧獨歸晚解說心中事月下短笛

謁金門

山銜日淚灑西風獨立一葉扁舟流水急轉頭無處  
覓去則而今已去憶則如何不憶明日到家應記

得寄書回鴈翼

點絳脣

一夜東風枕邊吹散愁多少  
數聲啼鳥夢轉紗窗曉  
來是春初去是春將老  
長亭道一般芳草只有歸時好

水龍吟 春夢

日高深院無人  
楊花撲帳春雲暖  
回文未就停鍼不  
語繡牀倚遍翠被籠香  
綠鬟墮膩傷春成倦  
儘雲山烟水柔情一縷  
又暗逐金鞍遠  
鸞珮相逢甚處似  
當年劉郎仙苑  
凭肩後約畫眉新巧  
從來未慣枕落釵聲  
簾開燕語風流雲散  
甚依稀難記人閒  
天上緣重見

齊天樂 次趙方谷韻

碧梧枝上占秋信  
微聞雨聲還  
恹恹虹影分晴  
雲光透晚殘日  
依依團箑闌干  
一霎又長笛歸舟  
亂鴉荒堞  
兩鬢西風有人心事  
到紅葉嬌蓮相對  
欲語奈蓮莖有刺  
愁不成折  
天上歡期人閒巧意  
今夜明河如雪  
新寬帶結想寶篆  
頻溫翠奩低揭  
霧濕雲鬟淺妝  
深拜月

李天驥字□飛廬陵人

詞

綜 卷二十八

八 中華書局聚

摸魚兒 燈花

又何須向明還滅寒花點綴孤影玉龍度海吹魚浪  
烟淡寶釵橫鬢斜又整是蟲滴驪珠兩兩相交頸夜  
長人靜恁玉果低拋金錢暗卜此意有誰領 歡娛  
事料想憑伊先應怕綃新淚猶凝銀篋未忍輕挑去  
只恐暗風吹燼重記省怕莫是明朝有箇青鸞信怎  
知無定算只解窺人人孤影隻成瘦又成病  
劉應幾號定叟安成人

憶舊遊 聞鴈

記銅駝載酒翠陌吹簫曾聽相呼不盡離離意攪柔  
腸如剪立馬踟躕人生似此蒼鬢堪得幾聲疎想怨  
入秋深愁隨天遠滿目平蕪 音書未曾寄正人在  
燕臺忘却回車奈菰蒲舊地山空木落霜老泉枯月  
明仙掌何處轉首失棲烏待說與雲間瀟湘近日風  
捲湖

周孚先號梅心西昌人

木蘭花慢

訪梅江路遠喜春在劍川湄正鴈磧雲深魚村笛晚  
茸帽斜欹舊遊不堪回首更文園多病減腰圍惟有  
秋娘聲價風流仍似前時 依稀壁粉舊曾題烟草

半淒迷歎單父臺荒黃公壚寂難覓佳期誰家歌樓  
催雪遣夜來風雨緊些兒醉後唾壺敲缺龍光搖動  
晴漪

蝶戀花

舟艤津亭何處樹曉起瓏璁回首迷烟樹江上離人  
來又去飄零只似風前絮倦倚蓬牕誰共語野草  
閑花一傷離緒明日重來須記取綠楊門巷深深  
處

尹濟翁字澗民吉州人

一萼紅和玉霄感舊

玉搔頭是何人敲折應爲節秦謳斐几朱絃剪燈雪  
藕幾回數盡更籌草草又一番春夢夢覺了風雨楚  
江秋却恨閑身不如鴻鴈飛過妝樓又是水枯山  
瘦歎迴腸難貯萬斛新愁懶復能歌那堪對酒物華  
冉冉都休江上柳千絲萬縷惱亂人更忍凝眸猶怕  
月來弄影莫上簾鉤

王從叔號山樵廬陵人

秋蘼香用清真韻

薄薄羅衣乍暖紅入酒痕潮面絮花舞倦帶嬌眼昨  
夜平堤水淺故人信斷風箏線誤歸燕夢魂不怕

山路遠無奈暮聲隔院

蕭漢傑號唵所吉水人

賣花聲春雨

濕逗晚香殘春淺春寒灑牕填戶著幽欄慘慘悽悽  
仍滴滴做出多般和霰撒珠盤枕上更闌芭蕉怨  
曲帶愁彈綠遍堦前苔一片曉起誰看

彭泰翁字會心安福人

拜星月慢祠壁宮姬控絃可念

霧滑觚稜塵侵團扇恨滿哀彈倦理控雨籠雲共閉  
情孤倚斂蛾黛怕似流鶯歷歷惹得玉銷瓊碎可惜  
闌干但苔花沉穗算天音不入人間耳何人謾裛  
損青衫淚不是舊譜都忘厭新腔嬌脆多生不得丹  
青意重來又花鎖重門閉到夜永笙鶴歸時月明天  
似水

趙功可號晚山廬陵人

曲游春

千樹籠芳草正蒲風微過梅雨新霽客裏幽窗算無  
春可到和愁都閉萬種人生計應不似午天閑睡起  
來時踏碎松陰蕭蕭欲動疑水借問歸舟歸未望  
柳色烟光何處明媚抖擻人間除離情別恨乾坤餘

幾一笑晴鳧起酒醒後闌干獨倚時見雙燕飛來斜陽滿地

戴山隱

滿江紅聞笛

醉倚江樓長空外行雲遙駐甚淒涼孤吹含商引羽薄夜冷侵沙浦鴈老龍吟徹寒潭雨驀涼颿一陣捲潮來驚飛去重欲聽知何處誰爲我胡牀據謾尋尋覓覓凝情如許舊日山陽猶有恨向生長往今誰賦恐憑欄人有愛梅心空愁竚

姜个翁

霓裳中序第一春晚旅寓

園林罷組織樹樹東風翠雲滴草滿地間行迹聽得聲聲曉鶯如覓愁紅半濕煞憔悴牆根堪惜可念我飄零如此一地送岑寂龜石當年第一也似老人間風日餘葩選甚顏色羞撚江南斷腸詞筆留春渾未得翻些入啼鶻夜泣清江晚綠楊歸思隔岸數峯出

詞綜卷二十八

詞

綜卷二十八

十一中華書局聚





詞綜卷二十九

元詞五十二首

虞 集 三首

鮮于樞 一首

宋 駉 一首

劉 詵 一首

曹伯啓 一首

許有壬 四首

許有孚 一首

馬 熙 二首

許 棨 二首

薩都刺 四首

張 翥 二十七首

袁 易 二首

沈 禧 一首

洪希文 一首

楊立齋 一首

虞

集字伯生號邵菴宋相允文五世孫家崇仁

以薦授大都路儒學教授累官翰林直學

士兼國子祭酒天曆中除奎章閣侍書學

士卒贈江西行省中書省參知政事封仁

壽郡公謚文靖有道園集

蘇武慢 和馮尊師

放棹滄浪落霞殘照聊倚岸迴山轉乘鴈雙鳧斷蘆

漂葦身在畫圖秋晚雨送灘聲風搖燭影深夜尚披

吟卷算離情何必天涯咫尺路遙人遠 空自笑洛

下書生襄陽耆舊夢底幾時曾見老矣浮丘賦詩明

月千仞碧天長劍雪霽瓊樓春生瑤席容我故山高  
宴待雞鳴日出羅浮飛度海波清淺

又

憶昔東坡夜游赤壁孤鶴掠舟西過英雄消盡身世  
茫然月小水寒星大何似漁翁不知今古醉傍蓼花  
燃火夢相逢羽服翩翩未必此時非我誰解道歲  
晚江空風帆目力橫槩賦詩江左清露衣裳晚風洲  
渚多少短歌長些玉宇高寒故人何處渺渺予懷無  
那歎乘桴浮海飄然未知誰可

風入松寄柯敬仲

畫堂紅袖倚清酣華髮不勝簪幾回晚直金鸞殿東  
風軟花裏停驂書詔許傳宮燭輕羅初試朝衫御  
溝水泮水接藍飛燕語呢喃重重簾幕寒猶在憑誰  
寄銀字泥械報道先生歸也杏花春雨江南

鮮于樞字伯機漁陽人官至太常典簿有困學齋

集

念奴嬌入詠樓

長溪西注似延平雙劍千年初合溪上千峯明紫翠  
放出羣龍頭角瀟灑雲林微茫烟草極目春洲闊城  
高樓迥恍然身在寥廓我來陰雨兼旬難聲怒起

日日東風惡，須待青天明。月夜一試嚴，維佳作風景。  
不殊溪山信，美處處堪行。樂休文何事，年年多病如  
削。

宋

髮字顯夫宛平人，泰定中進士，累官翰林直學士，贈國子祭酒，輕車都尉，范陽郡侯，謚文清。所著有燕石集詞一卷。

浣溪沙 崑山州城西小寺

落日吳江駐，畫橈招提佳處，暫逍遙。海風吹面酒全消，  
曲沼芙蓉秋的小，山叢桂晚蕭蕭。幾時容我夜吹簫。  
顯夫聽雨賀新涼詞，夢斷羅裙天如漆，一寸鄉心，淒楚點點是寂寥。情緒明日孤舟成獨往，更難堪。長夜瀟湘浦，亦有佳致，惜全首不稱也。

劉 詵 號桂翁廬陵人，謚文敏，有桂隱集附詞。

謁金門

春睡倦，自揀花枝行遍。昨日新紅今日變，細接將袖染。  
翠扇迎風撲面飛去，晴絲還轉。簾外楊花簾裏燕，相逢如未見。

曹伯啓字士開，陽山人，被薦拜西臺御史，歷集賢

學士，引年歸。天曆中召爲淮東廉訪使，陝西諸道行御史臺中丞，不起。贈行中書左

詞

綜 卷二十九

一一中華書局聚

一珍做宋版印  
丞上護軍追封魯郡公謚文貞有漢泉漫  
稿詞一卷

南鄉子 四川道中作

蜀道古來難數日驅馳興已闌石棧天梯三百尺危  
欄應被傍人畫裏看兩握不曾乾俯瞰飛流過石  
灘到晚纔知身是我平安孤館青燈夜更寒

許有壬字可用湯陰人延祐二年進士累官集賢

大學士改樞密副使拜中書左丞卒謚文  
忠有圭塘小稿詞一卷

摸魚子和明初韻

買陂塘旋栽楊柳歸來此是先務他鄉故里都休較  
舊雨不如今雨鴻在渚笑爾尚南飛吾已安孤嶼黃  
花解語道人老宜秋身安耐酒此正有真趣 鑿坡  
路大手深慚燕許超騰又悖鍾呂但求閑澹如元亮  
不恨詩無奇句傾綠醕底須按樂天池上霓裳譜休  
論往古有二日重陽約君同醉老子築西園

太常引池荷

幽人早起赴池亭初日照娉婷風蓋露珠傾又勝似  
前時雨聲 水沉香裏錦雲深處雙檜插天青一葉  
釣舟輕似野渡無人自橫

又

四隄楊柳接松筠香破水芝新羅襪不生塵笑畫裏  
凌波未真 紅衣縹緲清風蕭瑟半醉岸烏巾不是  
葛天民也做得江湖散人

沁園春臨清舟中次韓伯高見贈韻寄可行

草木無情不問寒暄開時便開只黃花多事偏憐隱  
逸白頭何補且避賢才老友相逢清談絕倒休校劉  
郎去後栽尊中物勝他年千里謾寄寒梅 神仙合  
住蓬萊奈老去思兒忍不回任景莊槐老誰爲癡夢  
杜家酒美且浣幽懷渭北江東暮雲春樹何日扁舟  
更此來公知否便連朝觴詠能幾徘徊

許有孚字可行官湖廣儒學副提舉歷中憲大夫

同僉太常禮儀院事

摸魚子

買陂塘旋栽楊柳不妨三月農務溪翁走報新痕漲  
昨夜西山雷雨將沒渚有複徑雙洲繚繞通孤嶼黃  
鸝對語正春色暄妍物華明媚好在浴沂趣 天涯  
路芳草茫茫如許蠻箋難寫心呂碧雲冉冉春波綠  
都是相思情句花共醕似梅與山礬臭味曾同譜堤  
陰樹古要亂絮漫空柔條蘸水慎勿折樊圃

馬 熙字明初

摸魚子

買陂塘旋栽楊柳夢中還理家務十年不到衡山麓  
辜負楚雲湘雨蘋映渚渺杜若江蘼香接烟霞喚口  
心相語為蠅驥東西雲龍上下誤却釣游趣 平生  
志欲識平輿二許煌煌岳降申呂菲詞聊為先生壽  
博得月章星句毋我醜只小草幽蘭心醉離騷譜松  
存徑古待游遍西園荷鋤歸去吾亦愛吾圃

太常引 和池荷韻

園中風物水中亭消得兩娉婷濁酒卷荷傾早洗盡  
箏聲笛聲 四隄晴柳一天花氣付與晚山青飛絮  
挾雲輕任膝上瑤琴自橫

許 楨有壬子有壬與楚人馬熙及弟有孚倡和  
楨與焉共為圭塘款乃集一卷

摸魚子

買陂塘旋栽楊柳求田專理農務扁舟來往烟波裏  
青籊綠蓑風雨時泛渚把遠岫遙岑收拾來孤嶼霜  
花笑語道鳳閣鸞臺黃塵烏帽爭似醉鄉趣 汨溪  
上道士而今誰許非熊夢斷姜呂水聲山色相縈繞  
湧出筆端新句斟桂醕聽萬籟笙竽一派仙家譜休

論往古向種菊籬邊觀魚軒外晚節有秋圃

太常引

池亭荷淨納涼時四面柳依稀棹得酒船回看風裏  
紗巾半欹 殘霞照水夕陽明樹天付畫中詩應不  
負歸期更誰看桃花面皮

薩都刺

字天錫鴈門人登泰定進士官京口錄事  
終河北廉訪司經歷

滿江紅金陵懷古

六代豪華春去也更無消息空悵望山川形勝已非  
疇昔王謝堂前雙燕子烏衣巷口曾相識聽夜深寂  
寞打孤城春潮急 思往事愁如織懷故國空陳迹  
但荒烟衰草亂鴉斜日玉樹歌殘秋露冷胭脂井壞  
寒蟿泣到如今只有蔣山青秦淮碧

小闌干

去年人在鳳凰池銀燭夜彈絲沉水香消梨雲夢暖  
深院繡簾垂 今年冷落江南夜心事有誰知楊柳  
風柔海棠月澹獨自倚欄時

百字令登石頭城

石頭城上望天低吳楚眼空無物指點六朝形勝地  
惟有青山如壁蔽日旌旗連雲檣艣白骨紛如雪一

江南北消磨多少豪傑  
寂寞避暑離宮東風輦路  
芳草年年發落日無人松  
逕裏鬼火高低明滅歌舞  
尊前繁華鏡裏暗換青青  
髮傷心千古秦淮一片明  
月

木蘭花慢 彭城懷古

古徐州形勝消磨盡幾英雄  
夢想鐵甲重瞳烏騅汗血  
玉帳連空楚歌八千兵散  
料夢魂應不到江東空有  
黃河如帶亂山迴合雲龍  
漢家陵闕起秋風禾黍  
滿關中更戲馬臺荒畫眉  
人遠燕子樓空人生百年  
寄耳且開懷一飲盡千鍾  
回首荒城斜日倚欄目送  
飛鴻

張

翥字仲舉晉寧人至正初以薦爲國子助教

累官河南行省平章政事兼翰林學士有  
蛻巖樂府三卷

瑞龍吟 癸丑歲冬訪游弘道樂安山中席賓米

仁則用清真詞韻賦別和以見情

鰲溪路瀟灑翠壁丹崖古藤高樹林間猿鳥欣然故  
人隱在溪山勝處 久延佇渾似種桃源裏白雲窗  
戶燈前素瑟清樽開懷正好連牀夜語 應是山靈  
留客雪飛風起長松掀舞誰道倦途相逢傾蓋如故



陽春一曲總是關心句何妨共磯頭把釣梅邊徐步  
只恐匆匆去故園夢裏長牽別緒寂寞閑鍼縷還念  
我飄零江湖烟雨斷腸歲晚客衣誰絮

多麗

西湖汎舟夕歸施成大席上以晚山青爲起

句各賦一詞

晚山青一川雲樹冥冥正參差烟凝紫翠斜陽畫出  
南屏館娃歸吳臺遊鹿銅仙去漢苑飛螢懷古情多  
憑高望極且將尊酒慰飄零自湖上愛梅仙遠鶴夢  
幾時醒空留得六橋疎柳孤嶼危亭待蘇堤歌聲  
散盡更須攜妓西泠藕花深雨涼翡翠菰蒲軟風弄  
蜻蜓澄碧生秋鬧紅駐景採菱新唱最堪聽一片水  
天無際漁火兩三星多情月爲人留照未過前汀  
摸魚兒送黃任伯歸豐城時任伯放其妾還家

故及

正匆匆楚鄉秋晚孤鴻飛過南浦同來桃葉堪惆悵  
一舸載春先去愁絕處問那曲闌干曾聽人低語今  
宵最苦向楓樹溪橋蘆花野館翦燭臥聽雨吳霜  
鬢破帽西風怎護絲絲多是離緒舊情頓冷新愁重  
總付墜鞭詞譜君記取待雪夜相思乘興柴岡路唱  
子和汝要款段隨車輕盈喚酒重爲國香賦

詞

綜卷二十九

五一中華書局聚

又春日西湖泛舟

漲西湖半篙新雨麴塵波外風軟蘭舟同上鴛鴦浦  
天氣嫩寒輕暖簾半捲度一縷歌雲不礙桃花扇鶯  
嬌燕婉任狂客無腸王孫有恨莫放酒杯淺垂楊  
岸何處紅亭翠館如今遊興全懶山容水態依然好  
惟有綺羅雲散君不見歌舞地青蕪滿目成秋苑斜  
陽又晚正落絮飛花將春欲去目送水天遠

又黃季景湖亭蓮花中雙頭一枝邀予同賞而

爲人折去季景惘然請賦

問西湖舊家兒女香魂還又連理多情欲賦雙蕖怨  
閑却滿奩秋意嬌旖旎愛照影紅妝一樣新梳洗王  
孫正擬喚翠袖輕歌玉箏低按涼夜爲花醉鴛鴦  
浦淒斷凌波夢裏空隣心苦絲脆吳娃小艇應偷採  
一道綠萍猶碎君試記還怕是西風吹作行雲起闌  
干謾倚待載酒重來尋芳已晚餘恨渺烟水

又題熊伯宣藏梅花卷子

記西湖水邊曾見查牙老樹如此冰痕冷沁苔枝雪  
的歷數花纔試天也似愛玉質清高不入閑紅紫孤  
山處士謾賦得招魂烟荒水暗寂寞抱香死春風  
筆休憶深宮舊事添人多恨多思黑池雪嶺三生夢

喚起縞衣仙子仍獨自伴瘦影黃昏和月窺窗紙聲  
聲字字寫不盡江南閑愁萬斛訴與綠衣使

又元夕吳門姚子章席上同柯敬仲賦敬仲以

虞學士書風人松于羅帕作軸故末句及之  
楚芳吳蘭二妓名

記蘭臺舊時風景西樓燈火如畫巖城月色依然好  
無復綺羅遊冶歡意謝向客裏相逢還有思陶寫金  
樽翠學把錦字新聲紅牙小拍分付倦司馬 繁華  
夢喚起燕嬌鶯姘肯教孤負元夜楚芳玉潤吳蘭媚  
一曲夕陽西下沉醉罷君試問人生誰是無情者先  
生歸也但留意江南杏花春雨和淚在羅帕

疎影 王元章墨梅圖

山陰賦客怪幾番睡起窗影生白縹緲仙姝飛下瑤  
臺淡竚東風顏色微霜却護朦朧月更漠漠暝烟低  
隔恨翠禽啼處驚殘一夜夢雲無迹 惟有龍煤解  
染數枝入畫裏如印溪碧老樹枯苔玉暈冰圍滿幅  
寒香狼藉墨池雪嶺春長好悄不管小樓橫笛怕有  
人誤認寒花欲點曉來妝額

解連環 留別臨川諸友

夜來風色歎青燈素被早寒欺客想寂寞人在簾櫳

望塞鴈欲來又催刀尺秋滿關河更誰倚夕陽橫笛  
記題花賦月此地與君幾度遊歷江頭楚楓漸赤  
對愁樽飲淚難問消息趁一舸千里東歸渺天未亂  
山水邊孤驛晚年華悵回首雨南雲北算今古此  
情此恨甚時盡得

綺羅香 雨中舟次汭上

燕子梁深秋千院冷半濕垂楊烟縷怯試春衫長恨  
踏青期阻梅子後餘潤留寒藕花外嫩涼銷暑漸驚  
他秋老梧桐蕭蕭金井斷蛩暮薰篝須待被暖催  
雪新詞未穩重尋笙譜水閣雲窗總是慣曾經處曾  
信有客裏關河又怎禁夜深風雨一聲聲滴在疎篷  
做成情味苦

喜遷鶯 瓊花

東風吹盡但一片綠陰空留春恨后土祠荒飛瓊謫  
久還喜玉容堪認二十四橋夜月二十四番花信便  
載酒怕芳菲易老陰晴難穩嬌困羞起晚竚立畫  
欄淨洗閑脂粉沉水濃薰蜂黃淡染自有絕塵香韻  
也知世間無對肯許浮花相近鳳簫遠待數枝折與  
玉峯人問

水龍吟 廣陵送客次鄭蘭玉賦蓼花韻

芙蓉老去妝殘露華滴盡珠盤淚水天瀟灑秋容冷  
淡憑誰點綴瘦葦黃邊疎蘋白外滿汀烟棹把餘妍  
分與西風染就猶堪愛紅芳媚 幾度臨流送遠向  
花前偏驚客意船窗雨後數枝低入香零粉碎不見  
當年秦淮花月竹西歌吹但此時此處叢叢滿眼伴  
離人醉

又蠟梅

玉人梳貌堪憐曉妝一洗鉛華盡此花應是菊分顏  
色梅分風韻萼點駝酥口攢金磬心凝檀粉甚女貞  
染就仙衣絕勝蜂兒重鵝兒嫩 說與玉龍莫品怕  
宮波一般流恨故人堪寄折枝代取江南春信沉水  
全薰蘂絲密綴額黃深暈乍燕姬未識是花是蠟笑  
俚人問

摘紅英

鶯聲寂鳩聲急柳烟一片梨雲濕驚人困教人恨待  
到平明海棠應盡 青無力紅無跡殘香賸粉那禁  
得天難準晴難穩晚風又起倚欄爭忍

齊天樂 臨川夜飲滄陽李輔之寓所

紅霜一樹淒涼葉驚烏夜深啼落客裏相逢尊前細  
數幾度雨飄風泊微吟緩酌漸月影斜欹畫欄東角

只怕梅花無人看管瘦如削  
江湖容易歲晚想多情念我歸信曾約塵土狂蹤山林舊隱夢寄草堂猿鶴離懷最惡是酒醒香殘燭寒花薄一段銷凝覺來無處著

木蘭花慢 次韻陳見心文學孤山問梅

愛西湖千樹曾幾度爲攜樽向柳外停橈苔邊待鶴酒熱詩溫瀛洲舊時月色悵荒涼惟有數枝存天上梨花成夢江南桃葉移根如今憔悴客愁村難返暗香魂甚歲晚春遲角寒笛曉雪暗雲昏登臨不堪寄目但青山隱隱月紛紛再約與君同醉從他啄木敲門

真珠簾 壽韓伯清提舉時在平江

銀蟾半露嬋娟影西風早次第中秋天氣涼透小簾櫳乍夜長遲睡見說靈巖山色好甚也不濃如歸意歸未趁西泠載酒南園尋桂還是客裏生朝把金尊綠酒與誰同醉烟雨隔垂虹望美人秋水桃葉妝樓團扇曲但小草鸞箋相寄傳示送白蘋一翦碧雲千里

東風第一枝 憶梅

老樹渾苔橫枝未葉青春肯誤芳約背陰未返冰魂

陽稍已含紅萼佳人寒怯誰驚起曉來梳掠是月斜  
花外么禽霜冷竹間幽鶴雲淡淡粉痕漸薄風細  
細凍香又落叩門喜伴金樽倚欄怕聽畫角依稀夢  
裏記半面淺窺朱箔甚時得重寫鸞箋去訪舊遊東  
閣

陌上花使歸閩浙歲暮有懷

關山夢裏歸來還又歲華催晚馬影雞聲諳盡倦郵  
荒館綠箋密記多情事一看一回腸斷待殷勤寄與  
舊遊鶯燕水流雲散滿羅衫是酒香痕凝處唾碧  
啼紅相半只恐梅花瘦倚夜寒誰暖不成便沒相逢  
日重整釵鸞箏鴈但何郎縱有春風詞筆病懷渾懶  
定風波商角調西江客舍酒後聞梅花吹香

滿窗醒而賦此

恨行雲特地高寒牢籠好夢不定婉晚年華淒涼客  
况泥酒渾成病畫欄深碧窗靜一樹瑤花可憐影低  
映怕明月照見青禽相並素衾正冷又寒香枕上  
薰愁醒甚銀牀霜凍山童未起誰汲牆陰井玉笙殘  
錦書迥應是多情道薄倖爭肯等閑孤負西湖春興  
八聲甘州扶日西湖泛舟午後遇雨

向芙蓉湖上駐蘭舟淒涼勝遊稀但西泠橋外北山

堤畔殘柳依依追憶鶯花舊夢回首冷烟霏惟有盟  
鷗好時傍人飛聽取紅顏象板儘歌回彩扇舞換  
仙衣正白蘋風急吹雨暗斜暉空惆悵離懷未展更  
酒邊忍又送將歸江南客此生心事只在漁磯

滿江紅錢舜舉桃花折枝

前度劉郎重來訪玄都燕麥回首地暗香銷盡暮雲  
低碧啼鳥猶知人悵望東風不管花狼藉又淒淒紅  
雨夕陽中空相憶繁華夢渾無迹丹青筆還留得  
恍一枝長見故園春色塵世事多吾欲避武陵路遠  
誰能覓但有山可隱便須歸栽桃客

風入松廣陵元夜病中有感

東風巷陌暮寒驕燈火鬧河橋勝游憶徧錢唐夜青  
鸞遠信斷難招蕙草情隨雪盡梨花夢與雲銷客  
懷先自病無聊綠酒負金蕉下帷獨擁香篝睡春城  
外玉漏聲遙可惜滿街明月更無人為吹簫

踏莎行江上送客

芳草平沙斜陽遠樹無情桃葉江頭渡醉來扶上木  
蘭舟將愁不去將人去薄劣東風天斜落絮明朝  
重覓吹笙路碧雲紅雨小樓空春光已到銷魂處

露華玉簪



瀛洲種玉總付與花神月底深  
斷琢就瑤笄光映鬢雲斜  
矗幾度借取搔頭別試漢宮  
妝束風露冷幽香半襟淡  
竚欄曲亭亭雪艷愁獨愛粉  
沁冰筩鬢撚金粟石上那回  
磨斷爭忍輕觸一自楚客歸  
來珠履舊遊誰續秋夢起殘  
妝半簪墜綠

謁金門 寒食臨川平塘道中

溪水漫岸口小橋衝斷沽酒人  
家門巷短柳陰旗一半  
細雨鳴鳩相喚曲港落花流  
滿兩兩睡紅鸂鶒暖惱人春  
不管

唐多令

花下鈿篋尊前白雪謳記懷中  
朱李曾投鏡約釵盃心已許  
詩寫在小紅樓忍淚上雲兜  
斷魂隨綵舟等閑間惹得離  
愁欲寄長河魚信去流不到  
白蘋洲

袁

易字通用吳郡人有靜春詞一卷

臺城路和師言送春

落紅填徑東風惡貪飛燕雛歸  
晚聽雨樓低留春地窄誰念  
閑情消滅天涯流覽正鷗渚  
波寬柳汀雲黯賴有遙峯數  
尖遮斷送愁眼年年春草又  
綠看花人自老遺恨天遠鴈  
柱凝塵鮫綃暗墨青鬢吳霜  
輕

詞

綜

卷二十九

九一中華書局聚

點風流漸懶但詩惱東陽病添中散院落無人繡簾  
和絮捲

燭影搖紅

日日春陰瑞香亭畔寒成陣鳳鞞頻誤踏青期寂寞  
牆陰冷翠被堆牀未整睡初酣風篁喚醒幾多心緒  
鵲語難憑燈花無準得酒澆愁舊愁不去添新病  
吳綾題滿斷腸詞歌罷何人聽寶篆香消晝永裊餘  
烟蕭蕭鬢影出門長嘯白鷺雙飛清江千頃

沈

禧字廷錫吳興人有竹窗詞一卷

踏莎行

雜組香絨錯綜紋理倚牀脈脈如春醉沉吟暗想玉  
京人雕鞍何處鳴珂里無限離愁誰知就裏滔滔  
比似西江水無情日夜向東流一緘好寄相思淚

洪希文字汝執莆田人有續軒渠集詞一卷

浣溪沙

丈室蕭條似病禪打窗風雨罷吟箋歸心一點落燈  
前猶有十三樓上酒可無三百杖頭錢一年心老  
一年年

楊立齋

鷓鴣天聽楊玉娥唱故人所撰曲有感

烟柳風花錦簇筵霜芽露葉玉裝船誰知皓齒纖腰  
會只在輕衫短帽邊啼粉靨咽冰絃舊遊一去更  
無傳詞人彩筆佳人口再喚春風到眼前

詞綜卷二十九

五言卷二十九

昔時人送舞台人口再與春風逐眼雨

昔時人送舞台人口再與春風逐眼雨

昔時人送舞台人口再與春風逐眼雨

詞綜卷三十

元詞五十八首

張 埜五首

吳 鎮一首

倪 瓚五首

顧德輝三首

陶宗儀二首

汪 斌一首

邵亨貞十二首

沈景高一首

羅 慶一首

唐桂芳一首

凌雲翰一首

王 行三首

楊樵雲三首

周晴川一首

張半湖一首

蕭東父一首

黃水村一首

傅按察一首

無名氏三首

張 雨七首

滕 賓二首

劉燕哥一首

陳鳳儀一首

張 埜字埜夫邯鄲人有古山樂府二卷

水龍吟游絲

落花天氣初晴隨風幾縷來何處飄飄冉冉悠悠颺  
颺欲留還去雪繭新抽青蟲暗墜簷蛛輕度看垂虹  
百尺縈迴不下似欲繫春光住 憑仗何人收取付  
天孫雲綃機杼浮踪浪跡忍教長伴章臺飛絮惹起

閑愁織成離恨萬端千緒望天涯盡日柔情不斷又  
閑庭暮

又皇慶癸丑重九登南高峯寄柳湯佐同知

重陽何處登臨玉驄慣識南山路秋空絕頂西風兩  
鬢白雲雙屨淅浦寒潮蘇堤畫舸吳宮烟樹不一尊  
瓊露數聲金縷將此景成虛負 試覓舊題詩句早  
爛斑雨苔無數瓊泉寶瑟不堪重記泛觴流羽笑撚  
黃花閑尋紅葉故人何處倚危欄北望燕雲掩靄又  
征鴻暮

石州慢

紅雨西園香雪東風還又春暮當時雙槳悠悠送客  
綠波南浦陽關一闋至今隱隱餘音眼前渾是分攜  
處此恨有誰知倚欄無語 疑竚天涯幾許離情化  
作暮雲千縷過盡征鴻依舊歸期無據京塵染袂故  
人應念飄零豈知翻被功名誤無處著羈愁滿春城  
烟雨

念奴嬌賦白蓮用仲殊韻

水風清暑記平湖十里寒生紈素羅襪塵輕雲冉冉  
髣髴凌波仙女雪豔明秋瓊肌沁露香滿西陵浦蘭  
舟一葉月明曾到深處 誰念玉珮飄零翠房淒澹

幾度相思苦異地相看渾是夢忍把荷觴深注碧藕  
多絲霜莖有刺脈脈愁烟雨江雲撩亂倚欄終日凝  
峙

奪錦標 七女

涼月橫舟銀潢浸練萬里秋容如拭冉冉鸞驂鶴馭  
橋倚高寒鵲飛空碧問歡情幾許早收拾新愁重織  
恨人間會少離多萬古千秋今夕誰念文園病客  
夜色沉沉獨抱一天岑寂忍記穿鍼亭榭金鴨香寒  
玉徽塵積凭新涼半枕又依稀行雲消息聽窗前淚  
雨浪浪夢裏簷聲猶滴

吳

鎮字仲圭嘉興人

漁父詞

題麀溪沈彥實處士畫冊

紅葉村西日影餘黃蘆灘畔月痕初輕撥棹且歸與  
挂起漁竿不釣魚

倪

瓚字元鎮無錫人有清閼閣遺稿詞一卷

人月圓

傷心莫問前朝事重上越王臺鷓鴣啼處東風草綠  
殘照花開悵然孤嘯青山故國喬木蒼苔當時明  
月依依素影何處飛來

又

驚迴一枕當年夢漁唱起南津畫屏雲嶂池塘春草  
無限消魂 舊家應在梧桐覆井楊柳藏門閑身空  
老孤篷聽雨燈火江村

柳梢青贈伎小孺英

樓上玉笙吹徹白露冷飛瓊珮玦黛淺含顰香殘栖  
夢子規啼月 揚州往事荒涼有多少愁縈思結燕  
語空津鷗盟寒渚畫欄飄雪

江城子感舊

窗前翠影濕芭蕉雨瀟瀟思無聊夢入鄉園山水碧  
迢迢依舊當年行樂地香徑杏綠苔饒 沉香火底  
坐吹簫憶嬌嬈想風標同步芙蓉花畔赤欄橋漁唱  
一聲驚夢斷無處覓不堪招

小桃紅

一江秋水淡寒烟水影明如練眼底離愁數行鴈雪  
晴天 綠蘋紅蓼參差見吳歌蕩槳一聲哀怨驚起  
白鷗眠

顧德輝

一名阿瑛字仲瑛崑山人舉茂才署會稽

教諭力辭不就後以子恩封武略將軍錢

塘縣男晚稱金粟道人有玉山草堂集

蝶戀花陳浩然招游觀音山宴張氏樓徐姬楚



蘭佐酒以琵琶度曲郊雲臺爲之心醉口  
占

春江暖漲桃花水畫舫珠簾載酒東風裏四面青山  
青似洗白雲不斷山中起過眼韶華渾有幾玉手  
佳人笑把琵琶理枉殺雲臺標外史斷腸只合江州  
死

青玉案

春寒惻惻春陰薄整半月春蕭索晴日朝來升屋角  
樹頭幽鳥對調新語語罷雙飛却紅入花腮青入  
萼盡不爽花期約可恨狂風空自惡曉來一陣晚來  
一陣難道都吹落

清平樂和石民瞻題桐花道人卷

鳳簫聲度十二瑤臺暮開遍瓊花千萬樹纔入謝家  
詩句仙人酌我流霞夢中知在誰家酒醒休扶上  
馬爲君一洗琵琶

陶宗儀字九成台州人流寓松江有南村集

念奴嬌九日有感次韻

黃花白髮又匆匆佳節感今懷昔雨覆雲翻無限態  
故國寒烟榛棘杜老漂零沈郎瘦損此意天應識劃  
然長嘯不知身是孤客呼酒謾撥清愁玉奴頻勸

兩臉添春色眼底生平空四海倦拂紅塵風憤戲馬  
臺荒登龍人老往事休追惜山林無恙也須容我高  
屐

南浦

如此好溪山羨雲屏九疊波影涵素暖翠隔紅塵空  
明裏著我扁舟容與高歌鼓柁鷗邊長是尋盟去頭  
白江南看不了何況幾番風雨 畫圖依約天開蕩  
清暉別有越中真趣孤嘯拓篷窗幽情遠都在酒瓢  
茶具水萍搖晚月明一笛潮生浦欲問漁郎無恙否  
回首武陵何許

汪

斌字以質績溪人有雲坡集

蝶戀花 送春

芳草天涯猶未歇暗綠稀紅柳絮纒飄雪有意送春  
還惜別杜鵑爭奈催歸切 繡閣無人簾半揭苦憶  
邊城十載音書絕惟有東風無異說年年來趁梅花  
月

邵亨貞字復孺號清溪華亭人有蛾術詞選四卷

浣溪沙

西子湖頭三月天半篙新漲柳如烟十年不上斷橋  
船 百媚燕姬紅錦瑟五花宛馬紫絲鞭年年春色

暗相牽

後庭花

銅壺更漏殘紅妝春夢闌江上花無語天涯人未還  
倚樓閑月明千里隔江何處山

又

刺船鸚鵡洲題詩黃鶴樓金谷銅駝夢湘雲楚水愁  
少年遊好懷依舊故人還在不在

凭欄人題曹雲西贈伎小畫

誰寫江南一段秋妝點錢塘蘇小樓樓中多少愁楚  
山無盡頭

掃花遊春晚次南金韻

柳花巷陌悄不見銅駝采香芳侶畫樓在否幾東風  
怨笛凭欄日暮一片閑情尚繞斜陽錦樹黯無語記  
花外馬嘶曾送人去 風景長暗度奈好夢微茫豔  
懷清苦後期已誤翦燭花未卜故人來處水驛相逢  
待說當年恨賦寄愁與鳳城東舊時行旅

祝英臺近和雲西老人秋懷韻

普天雲深夜雨幽興到何許風拍疎簾燈影逗窗戶  
自從暝宿河橋露聽江笛久不記舊遊湘楚 正無  
緒可奈滿目清商蕭蕭五陵樹斜掩屏山腸斷庾郎

賦幾回思遶蘋花夢尋蘭棹怕驚起故溪鷗鷺

珍做宋版印

沁園春美人眉

巧鬪彎環纖凝凝嫵媚明妝未收似江亭曉望遙山拂  
翠宮簾暮捲新月橫鈎掃黛嫌濃塗鉛訝淺能畫張  
郎不自由傷春倦爲皺多無力翻做嬌羞填來不  
滿橫秋料著得人間多少愁記魚箋緘啓背人偷斂  
鴈鈿交併運指輕柔有喜先占長顰難效柳葉輕黃  
今在不雙尖鎖試臨鸞一展依舊風流

又目

漆點填睂鳳梢侵鬢天然俊生記隔花瞥見疎星烟  
烟倚欄凝注止水盈盈端正窺簾曹騰立枕睥睨檀  
郎長是青端相久待嫣然一笑密意將成困酣曾  
被鶯驚強臨鏡按抄猶未醒憶帳中親見似嫌羅密  
尊前相顧翻怕燈明醉後看承歌闌鬪弄幾度孜孜  
頻送情難忘處是鮫綃搵透別淚雙零

蘭陵王歲晚憶王彥強作

暮天碧長是登臨望極松江上雲冷鴈稀立盡斜陽  
耿相憶凭欄起歎息人隔吳王故國年華晚烟水正  
深難折梅花寄寒驛東風舊遊歷記草暗書簾苔  
滿吟屐無情征旆催離席嗟月墮寒影夜移清漏依

稀曾向夢裏識恍疑見顏色  
空惜鬢毛白恨莫趁  
金鞍猶誤塵跡何時弭棹蘇臺側  
共漉酒紗帽放歌  
瑤瑟來時雙燕定到否舊巷陌

摸魚子 吳門九日次魏彥文韻

鴈來時晚寒初勁青燈搖動窗戶  
商聲暗起鄰牆樹  
觸景亂愁還聚秋又暮奈合造淒涼  
無處無笳鼓狂  
吟醉舞記滿帽簪花分籌藉草騎馬  
忘歸路 懷人  
遠有恨憑誰寄語虛名長是相誤  
天涯節序渾非舊  
留得滿城風雨心萬縷謾自喜孤高  
不惹沾泥絮羈  
懷倦訴好分付兒曹  
耘鋤三徑早晚賦歸去

又乙巳□山九日

記年時滿城風雨姑蘇臺下重九  
客樓已辦登臨屐  
曾爲好山回首延佇久望翠壁  
嶙峋閑却題詩手相  
逢野叟強笑折黃花亂簪烏帽來  
與共尊酒 流光  
去肯爲閑人宿留驚心節序依舊  
西風只管吹蓬鬢  
病骨尚堪馳驟官渡口便擬喚扁舟  
往問江潭柳  
年健否縱世故無情未應遲暮姑負  
此時候

齊天樂 甲戌清明雨中

離歌一曲江南暮  
依稀鬪橋回首立馬東風送人南  
浦認得當年楊柳梨花過後  
悄不見鄰牆弄梅纖手

綺陌東頭箇人還似舊時否  
相如近來病久縱腰圍暗減猶未全瘦宿酒昏燈重門夜雨寒食清明依舊新愁謾有第一是傷心粉銷紅溜待約明朝問舟官渡口

沈景高烏程人

沁園春和劉龍洲指甲

新脫魚鱗平分鵝管愛勒眉彎記招恨香蕉愁悵細說劃情嫩竹怨曲新翻纔貼梅鈿旋挑鉛粉繡領重交猶道寒嬌無奈笑輕拈杏帶淺揭湘班宮棋也學偷彈時縮就同心羞自看解傳杯頻賭藏鬪羅袖歸鞭重數刻印闌干暗解綃囊倦調瑤瑟餽蕊鶯兒繡閣間凝情處把瓜犀謾剝消遣春閑俞焯云景高舊家子也余見此詞纖麗可愛因定交焉

羅慶

水調歌頭遊武旌

雨晴山發翠溪淨水拖藍閑來共陪杖屨邂逅已成三齒齒清泉白石步步碧桃翠竹是處輒幽探行到釣臺下怪樹蔭空潭踏芳洲尋別館履屨巉巖壺天日月長在雲氣滿東南沽得一尊濁酒喚取山花谿鳥聽我醉中談異日再過此端為解征驂

唐桂芳

字仲寔新安人以薦授建寧路崇安縣教諭遷南雄路儒學正學者稱白雲先生所

著有武夸稿

水調歌頭前題次和

武夸最佳處晴氣碧於藍遠瞻崖壑溪曲六六與三  
二莫問塵生滄海休歎鶴歸華表好景且容探鐵笛  
破龍睡黑雨滿深潭笑神仙留蛻骨閱空巖幾人  
蹭蹬不遇太史滯周南最好擅場老子筆底文章如  
許何必事清談暫憩桃花下白馬稅飛驂

凌雲翰

字彥拙錢唐人至正己亥登鄉試榜授紹興路蘭亭書院山長不赴退居吳興梅林

村號避俗翁有柘軒集詞一卷

蝶戀花

過雨春波浮鴨綠草閣三間人住清溪曲舊種小桃  
多映竹亂紅遮斷松邊屋有客抱琴穿翠麓隔水  
呼舟應是憐幽獨歷歷武陵如在目幾時同借仙源  
宿

王

行字止仲長洲人有半軒集詞一卷

如夢令

題雪景便面

滿眼落花飛絮回首瓊林玉樹驢背是何人得了灑

橋詩句歸去歸去春到故園深處

虞美人 顧氏隱居

黃花翠竹臨溪處正是幽人住不嫌拄杖破蒼苔便  
道有時陰雨也須來 隔簾塵土紛紛起久厭襄陽  
市若能招我作西鄰從此一溪春水兩家分

又 鄒氏隱居

白雲紅樹秋山下一片江南畫門前流水帶晴沙更  
是繞籬寒菊正開花 如何眼底逢佳處偏許幽人  
住也須來此結茅茨莫待有人相寄草堂資

楊樵雲 涂川人

滿庭芳 影

只道空烟又疑流水依依却是行雲了然相對又是  
夢紛紜半面春風圖畫黃金在難鑄昭君溪橋斷梅  
花晴雪端的白三分 真真難喚醒三年抽藕織得  
榴裙甚徘徊窺鏡交翼鸞文一片飛花來去并刀快  
剪取晴紋無情處分明著眼強半滯春醺

水龍吟 夢

多情不在分明繡窗日日花陰午依依雲絮溶溶香  
雪覷他尋路一滴東風怎生消得翠苞紅榭被疎鐘  
敲斷流鶯喚起但長記弓彎舞 定是相思入骨到



如今月痕同醉教人枉了若還真箇匆匆如此全未  
惺鬆纈紋生眼胡牀猶據算從前總是無憑待說與  
如何寄

小樓連苑梅

一枝斜墮牆腰向人顫裊如相媚是誰剪取斷雲零  
玉輕輕妝綴不是幽人如何能到水邊沙際又匆匆  
過了春風半面儘長把重門閉只管相思成夢道  
無情又關鄉意蒼苔半畝如今已是鹿胎田地甚欲  
追陪却嫌花下翠環解語待何時月轉幽房醉了不  
教歸去

周晴川

程雪樓云予於近世諸家樂府惟清真犖  
然當于心晴川殊有宗風雨坐空山試閱  
一解便如輕衫駿騎上下五陵花發鶯啼  
垂楊拂面時也

十六字令

眠月影穿窗白玉錢無人弄移過枕函邊按十六字  
令卽蒼梧謠也張安國集中三首蔡伸道集中一首  
其首俱以一字句斷今本訛眠字爲明遂作三字句  
斷非也是詞見天機餘錦係周晴川作今相沿刻周

美成然片玉集無此其不係美成明矣

珍傲宋版印

張半湖

掃花游

柳絲曳綠正豈雨初晴水天清夏石榴綻也看猩紅  
萬點倚亭欹榭瑣闥深中料想酒闌歌罷日將下是  
那處藕花香勝沉麝窗外風竹打似戛玉敲金送  
聲瀟灑共觀古畫喚石鼎烹茶細商幽話寶鴨烟消  
天外新蟾低佳涼無價又丁東數聲簷馬

蕭東父

齊天樂

扇鸞收影驚秋晚梧桐又鳴疎雨翠箔涼多繡囊香  
滅陡覺簟冰如許溫存誰與更禁得荒苔露蛩相訴  
恨結愁縈風刀難剪幾千縷閑思前事易遠悵舊  
歡無據月墮湘浦軟玉分凋膩雲侵枕猶憶吹蘭低  
語如今最苦甚怕見燈昏夢游間阻怨殺嬌癡綠窗  
還噫否

黃水村

解連環 春夢

鳳樓倚倦正海棠睡足錦香衾軟似不似霧閣雲牕  
擁絕妙輕盈霎時曾見屏裏吳山又依約獸環半掩

乍教人覷了疑假疑真一種淒怨  
游絲落花滿院  
料當時錯怪杏梁歸燕謾記得栩栩多情似蝴蝶飛  
來撲翻輕扇偷眼簾帷早不見畫眉人面但凝思紅  
生半臉枕痕一線

傅按察

鴨頭綠錢塘懷古

靜中看記昔日淮山隱隱宛若虎踞龍盤下樊襄指  
揮相漢鞭雲騎圍繞江干勢不成三時當混一過唐  
之數不爲難陳橋驛孤兒寡婦久假當還挂征帆  
龍舟催發紫宸初卷朝班禁庭空土花暈碧輦路悄  
呵喝聲乾縱餘得西湖風景花柳亦凋殘去國三千  
游仙一夢依然天淡夕陽間昨宵也一輪明月還照  
臨安

無名氏

天淨沙

見老學叢談

枯藤老樹昏鴉小橋流水平沙古道淒風瘦馬夕陽  
西下斷腸人在天涯

又

平沙細草斑斑曲溪流水潺潺塞上清秋早寒一聲  
新鴈黃雲紅葉青山

又

西風塞上□笳月明馬上琵琶那抵昭君怨多李陵  
臺下淡烟衰草黃沙

張

兩字伯雨號貞居杭州人宋崇國公九成之

裔蚤游方外居茅山自號句曲外叟

燕山亭楊梅

鶴頂珠圓蝟肌粟聚寶葉揉藍初洗親剪翠柯遠贈  
筠籠脈脈紅泉流齒骨換丹砂笑尚帶儒酸風味誰  
記曾問譜西泠綠陰青子 君家幾度樽前摘天上  
繁星伴人同醉纖手素盤歷亂殷紅浮沉半壺脂水  
珍果同時惟醉寫來禽青李爭似爲越女吳姬染指  
滿江紅玉簪次班彥功韻

玉導纖長頓化作雲英香英風弄影綠鬟撩亂搔頭  
斜插璞小還思釵燕並叢幽略比蕉心狹看柔鬢點  
綴半開時微烘蠟 冰筋瘦瓊林滑芳徑底誰偷搯  
怕夜涼消得錦圍紅匝鵝管不禁仙露重蜜脾勝借  
清香發待使君絕妙好詞成須彈壓

雪獅兒賦

梅次仇山村韻

含香弄粉便勾引游騎尋芳城南城北別有西村斷  
港冰漸微綠孤山路熟伴老鶴晚先尋宿怕凍損三

花兩蕊寒泉幽谷 幾番花影濯足記歸來醉臥雪  
深平屋春夢無憑鬢底鬧蛾爭撲不如圖畫相對展  
官奴風竹燒黃燭一作獨自聽瓶笙調曲

蝶戀花新柳

誰道鵝兒黃似酒對酒新鵝得似垂絲柳鉛粉泥金  
初染就年年春雪消時候 一縷柔情能斷否兩重  
烟輕無力縈窗牖試看溪南陰十畝落花都聚紅雲  
帚

早春怨擬白石

眇得春來春寒春困陡頓無聊半剔殘缸片時春夢  
過了元宵 空山暮暮朝朝到此際無魂可消却倚  
東風水如衣帶草似裙腰

朝中措早春書易玄九曲新居壁

草堂移住古城隈堂後水平階要結柴桑鄰里不須  
鷗鷺驚猜 行廚竹裏園官菜把野老山杯說與定  
巢新燕杏花開了重來

太常引題李仁仲畫舫

莫將西子比西湖千古一陶朱生怕在樓居也用著  
風帆短蒲 銀瓶索酒并刀斫鱸船背錦模糊堤上  
早傳呼是那箇烟波釣徒

滕

賓字玉霄睢陽人官江西儒學提舉後棄家

入天台爲道士

鵲橋仙

斜陽一抹青山數點萬里澄江如練蕭風吹落櫓聲  
遙又喚起寒雲片片殘鴉古渡瘦驢村店漸覺樓  
頭人遠桃花流水小橋東是那箇柴門半掩

齊天樂華光閣誌別分韻得與字

片帆呼度西山曲匆匆載將春去路入翠寒浪翻紅  
暖一枕欹眠烟雨酒朋詩侶儘醉舞狂歌氣吞吳楚  
一樣風流依然猶是晉風度人生如此良遇問碧  
翁何意萍蓬教聚句落瑤臺香霏珠唾驚倒世間兒  
女渭川雲樹悵後夜相思玉蟾明處怕有新詩鴈來  
頻寄與

劉燕哥伎女

太常引餞劉參議歸山東

故人別我出陽關無計鎖雕鞍今古別離難兀誰畫  
蛾眉遠山一樽別酒一聲杜宇寂寞又春殘明月  
小樓間第一夜相思淚彈

陳鳳儀成都樂伎

一絡索送別

蜀江春色濃如霧擁雙旌歸去海棠也似別君難一點點啼紅雨此去馬蹄何處向沙堤新路禁林賜宴賞花時還憶著西樓否

詞綜卷三十





詞綜卷三十一補入

宋詞六十九首

蘇舜欽一首

韓維二首

章鑿二首

劉燾一首

歐陽澈二首

胡舜陟一首

胡仔二首

倪偁一首

王十朋一首

洪邁一首

姚述堯一首

湯思退一首

魏杞一首

牟璣二首

王自中一首

丘密七首

姜特立一首

蔡柟一首

張履信二首

王岵二首

韓嘯一首

姚鏞一首

羅椅一首

楊伯崑一首

周晉一首

楊纘二首

翁孟寅三首

趙汝芘五首

馮去非一首

許棐五首

陸叡一首

蕭泰來一首

趙希邁一首

趙崇璠一首

趙希彭二首

王藻一首

趙與鄧一首

樓 槃二首

珍做宋版印

鍾過一首

黃 蘭一首

陳策一首

李振祖一首

蘇舜欽字子美桐山人易簡之孫初補太廟齋郎

尋第進士以范仲淹薦召試集賢校理監

進奏院坐祠會除名後起為湖州長史罷

居蘇州卒有滄浪集

水調歌頭滄浪亭

瀟灑太湖岸淡汴洞庭山魚龍隱處烟霧深鎖渺瀰

間方念陶朱張翰忽有扁舟急檣撇浪載鱸還落日

暴風雨歸路遶汀灣 丈夫志當景盛恥疎閒壯年

何事憔悴華髮改朱顏擬借寒潭垂釣又恐鷗猜鷺

忌不肯傍青綸刺棹穿蘆荻無語看波瀾

韓

維字持國雍丘人累官太子少傅轉太師紹

聖中坐元祐黨安置均州徽宗初追復舊

官有南陽集

踏莎行次韻范景仁寄子華

歸鴈低空游蜂趁暖憑高目向西雲斷具茨山外夕

陽多展江亭下春波滿 雙桂情深千花明煥良辰

誰是同游伴辛夸花謝早梅開應須次第調絃管雙

桂樓千花

胡搗練令

夜來風橫雨飛狂滿地閒花衰草燕子漸歸春悄簾  
幙垂清曉天將佳景與閒人美酒寧嫌華皓留取  
舊時歡笑莫共秋光老

韋

驥字子駿錢唐人皇祐五年進士累官尚書  
主客郎中夔州路提點刑獄

減字木蘭花

人生可意祗說功名貪富貴遇景開懷且盡生前有  
限盃韶華幾許鷓鴣聲殘無覓處莫自因循一片  
花飛減却春

菩薩蠻和舒信道木心寺會

瓊盃且盡清歌送人生離合真如夢瞬息又春歸回  
頭光景非香噴金獸暖歡意愁更短白髮不須量  
從教千丈長

劉

燾字無言劉誼次子元祐中進士爲蘇軾黃  
庭堅所知有見南山集

花心動梅

偏憶江梅有塵表丰儀世外標格低傍小橋斜出疎  
籬似向隴頭曾識暗香孤韻冰霜裏初不怕春寒要

勒問桃李盈門怎生向前爭得  
省共蕭娘去摘玉  
纖映瓊枝照人一色淡粉暈酥多少飛來到得壽陽  
宮額再三留待東君管都將那別花不惜但只恐高  
樓又二三弄笛

歐陽澈字德明崇仁人高宗卽位南京伏闕上封  
事極詆用事大臣遂見殺所著有飄然集

六卷

玉樓春

年時醉倚温温玉如月精神疑可掬香絲篆裊一簾  
秋澹澹十分浮蟻綠興來笑把朱絃促切切含情  
聲斷續曲中依約斷人腸除却梨園無此曲

小重山

紅葉傷心月午樓襲人風細細遠烟浮懜騰醉眼不  
禁秋追舊事拍塞一懷愁心緒兩悠悠東陽消瘦  
損甚風流擬憑仙枕夢中遊無眠久通夕數更籌  
胡舜陟字汝名績溪人大觀中進士爲監察御史

建炎中以集英殿修撰知廬州遷壽廬等

州鎮撫使

漁家傲

幾日北風江海立千車萬馬濤聲急短棹峭寒欺酒

力飛雨息瓊花細細穿窗隙  
今我綠蓑青箬笠浮  
家泛宅烟波逸渚鷺沙鷗都舊識  
行未得高歌與爾  
相尋覓

胡

仔字元在新安人舜陟子寓居吳興號茗溪  
漁隱宣和間仕建安主簿有叢話百卷

滿江紅

泛宅浮家何處好茗溪清境占雲山  
萬疊烟波千頃  
茶竈筆牀渾不用雪蓑月笛偏相稱  
爭不教二紀賦  
歸來甘幽屏  
紅塵事誰能省青霞志方高  
引任家  
風舴艫生涯笊箸三尺鱸魚真好  
繪一瓢春酒宜閒  
飲問此時懷抱向誰論  
惟箕穎

水龍吟以李長吉美人梳頭歌填

夢寒銷帳春風曉檀枕半填香髻  
轆轤初轉欄杆鳴  
玉呶啞驚起眠鴨凝烟舞鸞翻鏡  
影開秋水解低頭  
試整牙牀對立香絲亂雲拖地  
纖手犀梳落處膩  
無聲重盤鴉翠蘭膏勻漬冷光欲溜  
鸞釵易墜年少  
偏嬌鬢多無力惱人風味甚含情  
不語下堦漫自折  
花枝戲

倪

偁字文舉吳興人紹興八年進士官太常寺

主簿有綺川詞一卷

臨江仙

珍做宋版印

結束征鞍臨驛路長林積雪消初天回春色到平蕪  
不堪盃酒罷便與故人疎一曲陽關歌未闋僕夫  
催上脩途非君思我更誰歟西風吹過雁應有寄來  
書

王十朋字龜齡樂清人由太學廷對擢第一除著

作郎遷大宗正丞累遷國子司業陞侍講  
歷四都守除侍御史以龍圖閣學士致仕  
諡忠文有梅溪集

點絳脣 醉釀

野態芳姿枝頭占得春長久怕鈎衣袖不放攀花手  
試問東風花似當時否還依舊謫仙去後風月今  
誰有

洪邁字景盧號野處

踏莎行

院落深沉池塘寂靜簾鈎捲上梨花影寶箏拈得雁  
難尋篆香消盡山空冷釵鳳斜欹鬢蟬不整殘紅  
立褪慵看鏡杜鵑啼月一聲聲等閒又是三春盡  
姚述堯錢唐人有簫臺公餘詞一卷

臨江仙呈桐川使君丁郎中仲京

佳節喜逢長久日翩翩鳧鳥朋來霜清天宇絕塵埃  
遙憐巴嶺月擬上曲江臺懷縣從容留客宴追歡  
正好傳盃使君歸騎莫相催更拚明日醉未放菊花  
開

湯思退

字進之處州人紹興中由縣令試博學宏  
詞科除祕書省正字累官端明殿學士僉  
書樞密院事後責居永州

菩薩蠻 水月寺

畫船橫絕湖波練更上雕鞍窮翠巘霜橘半垂黃征  
衣盡日香鐘聲雲外聽金界青松映何處是華山  
峯巒杳靄間

魏

杞字南夫壽春人一云開封人累官右僕射

兼樞密使以使金不辱命驟登相位乾道  
丁亥以災異同葉顥策免卒諡文節

虞美人 梅

冰膚玉面孤山裔肯到人間世天然不與百花同却  
恨無情輕付與東風麗譙三弄江梅曉立馬溪橋  
小只應明月最相思曾見幽香一點未開時

牟

璫字獻甫吳興人大理少卿有陵陽先生集

木蘭花 慢 錢公孫侔

詞

綜 卷三十一

四 中華書局聚

山城如斗大君肯爲兩年留問讀易堂前修然松菊  
留得君不天邊乍傳消息趁東風歸待翠雲裘留取  
去思無限江蘿香滿汀洲不妨無蟹有監州臭味  
喜相投怪底事朝來驪歌催唱喚起離愁羨君戲綵  
脫却一身輕無事也無憂昨夜夢隨杖履道林岳麓  
同游

漁家傲

病枕逢逢驚曉鼓那堪送客江頭路莫唱驪駒催客  
去風又雨花飛一片愁千縷折柳淒然無剩語加  
餐更把篝衣護泥滑籃輿須穩度雲飛處親闈安問  
應旁午

王自中字道甫平陽人淳熙中登進士第光宗朝

起知邵州興化軍

醉江月題釣臺

扁舟夜泛向子陵臺下偃帆收櫓水闊風搖舟不定  
依約月華新吐細酌清泉痛澆塵臆喚起先生語當  
年綸釣爲誰高臥烟渚還念古往今來功名可共  
能幾人光武一日星文驚四海從此故人何許到底  
軒裳不如蓑笠久矣心相與天低雲淡浩然吾欲高  
舉



丘 密字宗卿江陰軍人隆興元年進士累官資

政殿學士拜同知樞密院事卒諡文定有

詞一卷

洞仙歌 辛卯元夕

江城梅柳慣得春先處催趁風光上歌舞見九衢車  
馬流水如龍喧笑語羅綺香塵載路 歡娛多暇日  
樽俎風流重見承平舊官府有多少佳麗事墮珥遺  
簪芳徑裏瑟瑟珠璣翠羽好惜取韶華醉連宵更莫  
待收燈酒闌人去

又賦金林檎

豐肌膩體淡雅仍矜貴不與羣芳競姝麗向瓊林珠  
殿獨占春風仙仗裏曾奉三宮燕喜 低徊如有恨  
失意含羞樂事繁華竟誰記應憐我今老去無句酬  
伊吟未就不覺東風又起鎮獨自黃昏怯輕寒這情  
緒年年共花憔悴

沁園春 景明告行頗動懷歸之念偶得帥卿詞

因次其韻前闕奉送後闕以自見云

雨趁輕寒風作秋聲燕歸雁來動天涯羈思登山臨  
水驚心節物極目烟埃客裏逢君纔同一笑何遽言  
歸如此哉別離久算不應興盡却棹船迴 主人下

榻高齋更檢點笙歌頻宴開便流連不到迎春見柳  
也須小駐度臘觀梅樓上盈盈閨中脈脈應念胡麻  
好種栽從教去正危欄望斷小倚徘徊

撲蝴蝶蜀中作

鳴鳩乳燕春在梨花院重門鎮掩沉沉簾不捲紗窗  
紅日三竿睡鴨餘香一綫佳眠悄無人喚 謾消遣  
行雲無定楚雨難憑夢魂斷清明漸近天涯人正遠  
儘教閒了鞦韆覩著海棠開徧難禁舊愁新怨

夜行船越上作

水滿平湖香滿路繞重城藕花無數小艇紅妝疎簾  
青蓋烟柳畫船斜渡 恣樂追涼忘日暮簫鼓月明  
人去猶有清歌迢遞聲在芰荷深處

西江月

明日又還重九黃昏小雨疎風菊英萸糝一尊同付  
與今宵好夢 寒意梧桐葉上客愁畫角聲中小樓  
何日却從容千里此情應共

錦帳春己未孟冬樂淨見梅英作

翠竹如屏淺山如畫小池面危橋一跨著櫻亭臨水  
宛然郊野竹籬茅舍 好是天寒倍添妍雅正雪意  
垂垂欲下更朦朧月影弄晴初夜梅花動也

姜特立字邦傑麗水人以恩補郎淳熙中遷閣門  
舍人充春坊官幸於太子卽位以春坊舊  
人特恩無忌爲留正所論奪職寧宗朝拜  
慶遠軍節度使有梅山續稿詞一卷

蝶戀花送妓

飄粉吹香三月暮病酒情懷愁緒渾無數有箇人人  
來又去歸期有恨難留住明日尊前無覓處呼車  
籃輿只向雙溪路我輩情鍾君漫與爲雲爲雨應難  
據

蔡

柟字堅老號雲壑

鷓鴣天

病酒厭厭與睡宜珠簾羅幙捲銀泥風來綠樹花含  
笑恨入西樓月斂眉驚瘦盡怨歸遲休將桐葉更  
題詩不知橋下無情水流到天涯是幾時

張履信

字思順號遊初

柳梢青

雨歇桃繁風微柳靜日淡湖灣寒食清明雖然過了  
未覺春閒行雲掩映春山真水墨山陰道間燕語  
侵愁花飛撩恨人在江南

謁金門

詞

綜卷三十一

六一中華書局聚

春睡起小閣明窗兒底簾外雨聲花積水薄寒猶在裏  
欲起還慵未起好是孤眠滋味一曲廣陵應忘  
記起來調綠綺

王 嶠字季夷號貴英

祝英臺近

柳烟濃花露重合是醉時候樓倚花梢長記小垂手  
誰教釵燕輕分鏡鸞慵舞是孤負幾番晴晝 自別  
後聞道花底花前多是兩眉皺又說新來比似舊時  
瘦須知兩意長存相逢終有莫謾被春光僂僂

夜行船

曲水濺裙二月二馬如龍鈿車如水風颺游絲日烘  
晴晝人共海棠俱醉 客裏光陰難可意埽芳塵舊  
游誰記午夢醒來不覺小窗人靜春在賣花聲裏

韓 轆字子耕號蕭閒

高陽臺 除夕

頻聽銀籤重燃絳蠟年華袞袞驚心錢舊迎新能消  
幾刻光陰老來可慣通宵飲待不眠還怕寒侵掩清  
尊多謝梅花伴我微吟 鄰娃已試春妝了更蜂枝  
簇翠燕股橫金勾引東風也知芳意難禁朱顏那有  
年年好逞豔游贏取如今恣登臨殘雪樓臺遲日園

林

姚

鏞字希聲號雪蓬

謁金門

吟院靜遲日自行花影熏透水沉雲滿鼎晚妝窺露  
井飛絮游絲無定誤了鶯鶯相等欲喚海棠教睡  
醒奈何春不肯

羅

椅字子遠號澗谷

柳梢青

萼綠華身小桃花扇安石榴裙子野聞歌周郎顧曲  
曾惱夫君悠悠羈旅愁人似零落青天斷雲何處  
銷魂初二夜月第四橋春

楊伯崑

字彥瞻號泳齋

踏沙行

雪中疎寮借閣帖更以薇露送之

梅觀初花蕙庭殘葉當時慣聽山陰雙雪東風吹夢到  
清都今年雪比前年別重釀宮醪雙鈎官帖伴翁  
一笑成三絕夜深何用對青藜窗前一片蓬萊月

周

晉字明叔號嘯齋

清平樂

圖書一室香暖垂簾密花滿翠壺熏研席睡覺滿窗  
晴日手寒不了殘棊篝香細勘唐碑無酒無詩情

詞

綜

卷三十一

七

中華書局聚

緒欲梅欲雪天時

楊

纘字繼翁號守齋

八六子 牡丹次白雲韻

怨殘紅夜來無賴雨催春去匆匆但暗水新流芳恨  
蝶淒蜂慘千林嫩綠迷空 那知國色還逢柔弱華  
清扶倦輕盈洛浦臨風細認得凝妝點脂勻粉露蟬  
聳翠藥金團玉成叢幾許愁隨笑解一聲歌轉春融  
眼朦朧凭欄半醒醉中

一枝春 除夕

竹爆驚春競喧填夜起千門簫鼓流蘇帳暖翠鼎緩  
騰香霧停盃未舉奈剛要送年新句應自有歌字清  
圓未誇上林鶯語 從他歲窮日暮縱閑愁怎減劉  
郎風度屠蘇辦了迤邐柳欺梅妒宮壺未曉早嬌馬  
繡車盈路還又把月夜花朝自今細數

被花惱 自度腔

疎疎宿雨釀寒輕簾幙靜垂清曉寶鴨微溫瑞烟少  
簷聲不動春禽對語夢怯頻驚覺欹珀枕倚銀牀半  
窗花影明東照 惆悵夜來風生怕嬌香混瑤草披  
衣便起小徑回廊處處都行到正千紅萬紫競芳妍  
又還似年時被花惱驀忽地省得而今雙鬢老

翁孟寅字賓賜號五峯

齊天樂元夕

紅香十里銅駝夢如今舊遊重省節序飄零歡娛老大慵立燈光蟾影傷心對景怕回首東風雨晴難准曲巷幽坊管絃一片笑相近飛棚浮動翠葆看金釵半溜春爐紅粉鳳輦山雲收霧斂迤邐銅壺漏迥霜風漸緊展一幅青綃淨懸孤鏡帶醉扶歸曉醒春夢穩

燭影搖紅

樓倚春城瑣窗曾共巢春燕人生好夢逐春風不似楊花健舊事如天漸遠奈晴絲牽愁未斷鏡塵埋恨帶粉棲香曲屏寒淺環珮空歸故園羞見桃花面輕烟淺照下闌干獨自疎簾捲一信狂風又晚海棠花隨風滿院亂鴉啼後杜宇啼時一聲聲怨

阮郎歸

月高樓外柳花明單衣怯露零小橋燈影落殘星寒烟蘸水萍歌袖窄舞環輕梨花夢滿城落紅啼鳥兩無情春愁添曉醒

趙汝芘字參晦號霞山

梅花引

詞

綜卷三十一

八中華書局聚

對花時節不曾歡見花殘任花殘小約簾櫳一面受  
春寒題破玉楸雙喜鵲香燼冷遶雲屏渾是山待  
眠未眠事萬千也問天也恨天髻兒半偏繡裙兒寬  
了還寬自取紅氍重坐暖金船惟有月知君去處今  
夜月照秦樓第幾間

夢江南

簾不捲細雨熟櫻桃數點霽霞天又曉一痕涼月酒  
初消風急絮花高閒游處磨盡少年豪昨夢醉來  
騎白鹿滿湖春水段家橋濯髮聽吹簫

戀繡衾

柳絲空有萬千條繫不住溪頭畫橈想今宵也對新  
月過輕寒何處小橋玉簫臺榭春多少溜啼痕盈  
臉未消怪別來燕支慵傅被東風偷在杏梢

漢宮春

著破荷衣笑西風吹我又落西湖湖間舊時飲者今  
與誰俱山山映帶似攜來畫卷重舒三十里芙蓉步  
障依然紅翠相扶一目清無留處任屋浮天上身  
集空虛殘烟夕陽過雁點點疎疎故人老大好襟懷  
消滅全無漫贏得秋聲兩耳冷泉亭下騎驢

如夢令



小砑紅綾箋紙一字一行春淚封了更親題題了又  
還折起歸未歸未好箇瘦人天氣

馮去非字可遷號深居

喜遷鶯

涼生遙渚正綠芰擎霜黃花招雨鴈外漁燈葦邊蟹  
舍絳葉□秋來路世事不離雙鬢遠夢偏欺孤旅送  
望眼但憑舫微笑書空無語 慵看清鏡裏十載征  
塵長把朱顏汚借筇青油揮毫紫塞舊事不堪重舉  
間關故山猿鶴冷落同盟鷗鷺倦遊也便檣雲拖月  
浩歌歸去

許

斐

字忱父海鹽人有梅屋稿及獻醜集嘉熙  
閒自爲序

鷓鴣天

翠鳳金鸞繡欲成沉香亭下款新晴綠隨楊柳陰邊  
去紅踏桃花片上行 鶯意緒蝶心情一時分付小  
銀箏歸來欲醉花柔困月濾窗紗約半更

琴調相思引

組繡盈箱錦滿機倩人縫作護花衣恐花飛去無復  
上芳枝 已恨遠山迷望眼不須更畫遠山眉正無  
聊賴雨外一鳩啼

後庭花

一春不識西湖面翠羞紅倦雨窗紅淚搖相管意長  
箋短 知心惟有雕梁燕自來相伴東風不管琵琶  
怨落花吹徧

夜行船

一轡東風留不住離歌斷日斜春暮多事啼鶯如情  
飛燕一路送人歸去 文君自被琴心悞却惆悵落  
花飛絮錦字機寒玉爐烟冷門外亂山無數

喜遷鶯

鳩雨細燕風斜春悄謝娘家一重簾外卽天涯何必  
暮雲遮 釧金寒釵玉冷薄醉欲成還醒一春梳洗  
不簪花孤負幾年華

陸

叡字景思號雲西

瑞鶴仙梅

濕雲黏鴈影望征路愁迷離緒難整千金買光景但  
疎鐘催曉亂鴉啼暝花棕暗省許多情相逢夢境便  
行雲都不歸來也合寄將音信 孤迥盟鸞心在跨  
鶴程高後期無準情絲待翦翻惹得舊時恨怕天教  
何處參差雙燕還染殘朱剩粉對菱花與說相思看  
誰瘦損

蕭泰來字則陽號小山

霜天曉角梅

千霜萬雪受盡寒磨折賴是生來瘦硬渾不怕角吹  
徹清絕影也別知心惟有月元沒春風情性如何  
共海棠說

趙希邁字瑞行號西里

八聲甘州竹西懷古

寒雲飛萬里一番秋一番攪離懷向隋堤躍馬前時  
柳色今度蓬萊錦纜殘香在否枉被白鷗猜千古楊  
州夢一覺庭槐歌吹竹西難問拚菊邊醉著吟寄  
天涯任紅樓踪跡茅舍染蒼苔幾傷心橋東片月趁  
夜潮流恨入秦淮潮回處引西風恨又渡江來

趙崇璠字漢宗號白雲

蝶戀花

一剪微寒禁翠袂花下重開舊燕添新壘風旋落紅  
香匝地海棠枝上鶯飛起薄霧籠春天欲醉碧草  
澄波的情如水料想紅樓挑錦字輕雲淡月人憔悴

趙希彭字清中號十洲

霜天曉角桂

詞

綜卷三十一

十一中華書局聚

姮娥戲劇手種長生粒寶榦婆娑千古飄芳吹滿虛  
碧韻色檀露滴人間秋第一金粟如來境界誰移  
在小亭側

秋藥香

髻穩冠宜翡翠壓鬢絲絲金藥遠山碧淺蘸秋水香  
暖榴裙襯地寧寧二八餘年紀惱春意玉雲凝重  
步塵細獨立花陰寶砌

王

藻字身甫號瓦全

霜天曉角梅

疎明瘦直不受東皇識留取伴春應肯萬紅裏怎著  
得夜色何處笛曉寒無奈力若在壽陽宮殿一點  
點有人惜

趙與鉤

字慶御號岷崙

謁金門

歸去去風急蘭舟不住夢裏海棠花下語醒來無覓  
處薄倖心情似絮長是輕分輕聚待得來時春幾  
許綠陰三月暮

樓

槃字考甫號曲澗

霜天曉角梅

月淡風輕黃昏未是清吟到十分清處也不啻二三

更 曉鐘天未明 曉霜人未行 只有城頭殘角說得  
盡我平生

又

剪雪裁冰有人嫌太清 又有人嫌太瘦 都不是我知音  
誰是我知音 孤山人姓林 一自西湖別後 辜負  
我到如今

鍾 過字改之號梅心

步蟾宮

東風又送酴醿信 早吹得愁成潘鬢 花開猶是十年前  
人不似十年前俊 水邊珠翠香成陣 也消得燕  
窺鶯認 歸來沉醉月朦朧 覺花氣滿襟猶潤

黃 蘭字元易號東浦

柳梢青

病酒心情喚愁無限 可奈流鶯 又是一年花驚寒食  
柳認清明 天涯翠巘層層是 多少長亭短亭倦倚  
東風 只憑好夢飛到銀屏

陳 策字次賈號南墅

摸魚兒 仲宣樓賦

倚危樓 醉春懷 古輕寒 纔轉花信 江城望極 多愁思  
前事惱人 方寸湖海 興算合付元龍 舉白澆談 吻憑

高試問問舊日王郎依劉有地何事賦幽憤沙頭  
路休記家山遠近賓鴻一去無信滄波渺渺空歸夢  
門外北風淒緊烏帽整便做得功名難綠星星鬢敲  
吟未穩又白鷺飛來垂楊自舞誰與寄離恨

李振祖號中山

浪淘沙

春在畫橋西畫舫輕移粉香何處度連漪認得一船  
楊柳外簾影垂垂誰倚碧欄低酒暈雙眉鴛鴦並  
浴燕交飛一片閒情春水隔斜日人歸

詞綜卷三十一